

四庫全書

集部

欽定四庫全書

集部

灌園集卷五

六

詳校官庶吉士臣陳若霖

侍讀臣孫球覆勘

謄錄監生臣張曾壇

謄錄監生臣范維城

欽定四庫全書

灌園集卷五

宋 呂南公 撰

七言律詩

呈知府內翰即次原韻

某頓首伏蒙知府內翰以某微時舊稿或似
可觀特賜篇章過形褒借園廬有幸絀裘增
榮夫大聲所入蓋非俚耳之能而無言不酬
是亦先民之訓謹循嚴韻特致斐吟僭瀆有

愆戰越以俟某再拜

山人何事忽伸眉
新得陳王七步詩
題是船齋高詠後
開當寒谷帶經時
仁風坐使羣心動
健筆潛將暖律移
硯席久荒青紫乏
報酬非稱更慚遲

憂來無處寄深思
也擬春秋也作詩
空役肺腸添故紙
有何勲烈補明時
身唯蓬革行將老
志似嵩丘永不移
誰使翰林東道主
肯敷餘論憫衰遲

重遊松溪偶題八句示升卿

七年前已到松溪不慮重經有此時寒苦慣為窮進士
清高長羨病禪師雲山契分輸今日香火因緣歎夙期
庭栢森森秋實在向來塵想誤多疑

夢寐

偶入重城坐客堂年年風味只荒涼春花秋月各無味
晚鼓曉鐘俱斷腸別恨不堪詩控引高情猶賴酒分張
著書耕釣平生事夢寐西村五畝桑

送傅濟道之漳浦尉

河梁東度送征鞭屈指閩荒路二千難向解攜無一語
再思重見尚三年高堂上壽今誰及白屋青衫合自憐
努力官箴莫輕墮清時無善不登延

送劉賢甫之餘干尉

太學諸生初入官綠衣新尉古餘干科場得志已容易
下邑徒勞不足難崔澤察姦行繚繞鋤廳參論坐盤桓
羽儀更養文章去他日雲天見孔鸞

出蔡州

奉天橋下水湯湯橋上征人破曉光秋色稍能禁暑氣
客愁終欲害離腸遭逢未入千年會窮苦猶為此日忙
笑殺壺公祠畔路又隨塵土過仙鄉

奉酬純父浚都病起見寄

建康學士註魚蟲杞罕兵官策守攻此日精勤徒有得
異時榮盛各成空吾能委曲謀田上君乃呻吟厭旅中
故國他鄉俱未快勞生何事不齊同

奉別道先

邂逅過從兩載強
詩書存問滿藜牀
光榮得路誰非友
道義心知獨不忘
聖代君才多勉勉
中年吾髮已蒼蒼
牙絃自此聊停緩
萬里窮山隔帝鄉

桐城與曾唐傑話別

事物無窮世路長
人生聚散亦堪傷
寒暄旦暮年年急
塵土風波處處忙
我馬欲衝梁苑雪
君帆先犯楚天霜
交情若是存悠久
定有音書入帝鄉

宿青綏鋪

兩檻中間風脚橫解衣鋪簟近南榮
曦光欲墮已睡熟斗柄轉斜纔夢驚
方恨此時無月色未知何處有蚊聲
塵埃惡熱明朝路會為今宵動旅情

過洪州

未定榮華與退休三年四度過洪州
紅塵白日知何得西去東歸不自由
一帶好山誰舊隱百端閒事我新憂
可能石馬亭邊路見客區區到白頭

道先游仙都至李尊師故居見余早歲題贈拙

句存於屋壁輒寄四韻重相歎賞謹有賡酬

仙李枝條萬國分隴西舊望道家孫曾經二十載還往
忽過七千餘曉昏人落九泉無可奈詩存古壁更休論
困窮辭氣君偏愛太息南征返北轅

十月二十日過陳二表民追講昔年同學事迹
慨然贈之以詩

西齋共學昔辛勤一別侵尋十四春此日科場還似夢
舊時書屋已成塵文章不鬪錢財福貧病長依寂寞濱

相值酒邊當取醉大家忘却困窮身

百年

百年長短有愁兼世味如今豈足沾客路無聊貧冉冉
春風相值病厭厭辭章漫與前賢並氣調終遭俗士嫌
安得一廛閒散去耕桑吟醉似陶潛

曉陪內翰步至北園

曉風吹雨北園開追逐雙旌踏翠苔芍藥一欄霞上錦
嫩荷千片玉流盃多年架閣游春興此日關防感物才

花不能言草成恨故應知我偶然來

次韻顯翁幽居即事

丈高只合論錢神屈膝須防望貴塵
軒冕未來應有命丘園隨分亦安身
山樵水釣心常逸夜坐朝耕樂更均
嗟我久懷農圃計何時操耒即相親

送唐傑重過金陵

金陵春水解歸舟重到金陵恰仲秋
世路已銜奔走恨風光更引別離愁
支持事變何由辨歎息安閒不易求

祇有北山長好在為余頻上冶城頭

寄贈張縣丞

二年來往南豐路飽聽鄉民說縣丞剛果已如秋漢鶚
潔清仍似玉壺冰室無姦吏縱橫入門有書生旦暮登
何事廉車帷幕厚不將高位待賢能

熙寧五年歸至舊山傷已感時作詩奉呈升卿
黃丈

幾年奔走背農桑半世歸來只感傷蛇足畫成曾失酒

古書看遍却亡羊一屨席屨何從受三徑園廬已就荒
猶賴比鄰賢父老許同飛鷺賊餘糧

杉樹湖前流水遠石城街左亂山蒼灘深潭淺無由問
竹秀松枯不可常物理自應隨變動道心聊欲寄存亡
唯君坐占忘言境珍重詩編與酒觴

再和呈二首

五畝之園未種桑自憐疎懶致財傷稻粱只是同鷄鶩
皮鞮徒勞勝犬羊敢羨蘓秦終富貴正憂郝鑒遇饑荒

遭承若值開元日何卹東南萬里糧

茂林修竹舊時鄉爭得安閒兩鬢蒼長憶樵漁有山澗
豈論勲業到旂常兒童好在今初見故舊尋來半已亡
此意不堪頻念慮便傾襟抱付深觴

再用前韻奉贈升卿三十一丈

百年此地有維桑後慶唯公免物傷早歲懿文如鸞鷟
一生純德似羔羊人推奧學追三籟自許寬巾貯八荒
冷笑村田諸父老滿胸茅塞只貲糧

好德年高富且康就中多福荷穹蒼吟哦有得能千首
議論無窮只五常此日鄉閭獲矜式異時風化免銷亡
嗟余欲買西隣住歲為先生祝壽觴

金陵遞中示到亨父老丈去年秋初見寄詩書
捧詠無窮之意不勝私感因成四韻奉呈

郵籤初發去年書嘆息貧窮未破除乞食君方如檻虎
賊糧我亦似卑居有求自恨傷生酷多難誰能慮事疎
同病相憂古來語此情今日好欬歔

九月一日口號奉呈顯翁文叔

九秋未盡六秋窮
露冷風高爽氣雄
無事日成多事過
故鄉身與異鄉同
心隨酒盞歸愁外
眼對時花到夢中
鴻鴈已南吾漸北
自憐安穩愧龐公

次韻酬朱推官

上國輝光不許觀
故園岑寂且閒眠
無心自可齊窮達
有口皆能論聖賢
百本柔桑繞茅屋
一陂清水灌沙田
餘生飽暖聊依此
豈有高風遠市廛

寄酒伴唐彦君益

門外水渠鳴漉漉屋頭桐葉落翩翩
向來苦旱難尋井及此愁霖易怨天
數盞舊藏真糯液一盤初爛壯牛肩
故人忙迫城隍遠獨息書牀又醉眠

得鄉信

鄉信迢迢出舊山琴心先落斷絃間
數行文字傳新事幾段悲歡破客顏
聞喜竹林經雪好想憐溪水逐年閒
征衫有淚歸無計一夜窮魂趁夢還

過聶彥倫故宅

彥倫門外舊城牆
雉堞崩銷草木荒
人物已成塵土去
風煙猶與歲時長
綠衫科第何曾貴
白髮詩書不可常
平昔往還吾亦預
經過此日倍淒涼

范十七司理見問歲除鰕蔬夜飲之約新春愆
爽以八句答之

田泥渙爛鰕懷子
圃壟肥腴菜長心
僧鉢縱然忘忌諱
書刀何忍屢殘淫
村漁不遜財難動
澍雨無端草易深

拘束學官懶復懶坐愁佳約未能尋

范君寄住北成佛屋

出都

霜風吹背出皇都大笑回頭謝酒壚
楚國但聞悲棄璞魯門那復辨真儒
百年風槩文終在一世光榮意已無
乞得耕桑了疎野太平何害有潛夫

稚女

衣無羅綺且貧清口有詩書亦性靈
論客鬚多如反寇笑爺帽破似窮伶
園中果熟心先動案上盃傳眼更青

釵擬荆枝帚擬布暮年吾活正凋零

寄李居士

三月山城歎旅窮冷看豪士振澆風
送花盤上春情重賣酒壚前醉魄雄
鐘鼓聒眠崇佛廟綺羅爭路拜神宮
此懷若向林泉說又落仙翁大笑中

奉答顧言見寄新句二首

早年辛苦待飛翻翅折無因達九關
更使襟靈憎市井足知緣分在雲山
誰憐古學長無用自幸餘生且就閒

多謝鹿鳴筵上友解傳詩句慰衰顏

羨君肝膽壯難攀不厭長安出入關探穴定期收虎子
採薇寧暇顧西山盱衡自慶千年運冷笑人求一日閒
乃肯題詩寄空谷的於游舊有溫顏

和酬道先賢良見寄新句

中林獨往寡襟期祇與耕桑治町畦遲晚識君真幸會
生平於世似分攜未能捧履師黃石且欲同歌效紫溪
郡閣郊園遙百里未妨懷寄屢封題

池口阻風奉寄唐傑

貴池亭下浪如山觸撥愁根阻櫂間
眼為故人成北望夢知鄉路數東還
此生太半淪憂患萬事何時脫險艱
不敢臨流更窺影便疑秋鬢已斑斑

子發移令上高

兩州三載屈叅卿百里初來福困忙
無處不思逃濁暗此邦何幸得賢明
後生智足科防密凶歲財傷性命輕
能為愛人忘富貴豈徒循吏有佳聲

有懷溪齋奉寄微之

溪光清媚四山稠十五年前記薄遊
茆屋讀書風滿座
野橋尋酒月當頭
身名不分輕如夢
甲歷誰令過若流
此地主人相問否
一厘今帶百端憂

題陶集

未讀陶詩已愛閒
自從能讀轉思山
烟霞合定徘徊分
塵土剛侵勉強顏
伊昔有人安白屋
祇今何事慕青綸
披簑戴笠終當去
更在規謀俛仰間

豫章城

西山東下古池隍增飾依稀問晚唐平世但嚴民堯鑰
亂時曾是賊金湯春歸舊堞多芳草鳥聚荒碑正夕陽
也欲登臨賦風物自憐才筆厭憂傷

曉過城隍街馬上看木芙蓉

秋來風味苦闌珊偶為繁紅畧據鞍何處更期征鴈過
祇今聊作故人看三冬已至休爭氣九月將殘未覺寒
自有榮華趁時節免將憔悴惜幽蘭

八月十四夜小雨

小雨遮空意未迴，輕風迎夜勢初來。
青樓月好人何在，錦帳燈寒扇自開。
四七功名真土芥，一千期運亦烟埃。
會須放縱雲雷手，不到人間有剩才。

高賦亭二首

耳外蜩螗響切，纔眼前岡麓秀環。
迴曦光墮地，收風盡雲脚遮山。
送雨來長，恐易成多事，恨可憐。
難見絕塵才，何由上得崐崙頂。
試使煩襟磊落開。

事變紛紛不可防，祇應人世惡憂傷。
高情易與時風背，遠慮空為智士忙。
感古有懷成戚戚，就書圖活得遑遑。
貧窮到處乖，淙況不但他鄉異故鄉。

將歸南城留別高賦亭二首

一上高亭一慘然，颼流無狀見風煙。
林泉本是儂家分，衣食剛為此世牽。
流水嶺雲能自得，樵歌谷響遠相連。
來時祇恐禽魚笑，掩斂南華第一篇。

寄食官齋過一暮，登臨容易此階梯。
四時光景非無樂，

千里憂傷却自迷
曠望可能舒感慨
幽吟長是寫酸嘶
從今風物多清暇
免被書生掩淚題

清明日再題高賦亭

二年來作旅行人
節物相逢但感情
彭蠡湖邊看競渡
擬陽山畔過清明
游神杳默皆愁意
傾耳尋常得恨聲
若有桑麻三畝地
肯將高跡學蓬萍

送子發赴江州司理

湓江湛湛照闌闌
廬岳蟠蟠陰郭郭
此地一官雖鬱屈

異人當日亦踟躕元規樓下隨紅旆居易祠前看白鬚
才調似君真不薄有詩無吝寄雲夫

寄范司理

郡南郡北叫呼間硯席相望聚首難笑我性靈偏忍餓
憐君風韻似無官儻來富貴能多與不朽文章倍好看
莫怪參尋頗踈緩鞋穿衣薄怯霜寒

送張司理

三年頻說獄空虛歎息賢才治有餘曉踏府塵鈴官眇

夜吟庭月樹扶疎尚微官職人皆有已大精神衆不如
努力無忘建功業禿毫他日為君書

感懷奉呈純父

去年三月出京關汴水東奔不可寬今歲此時還逆旅
牡丹開盡未曾看春風祇管添鬚髮世事爭來觸肺肝
傳語百憂休恣橫已因泉石著南冠

次韻彥臣感懷

不得經綸輔太平枉於天地荷生成少如賈誼頻垂涕

老似樊須請學耕
醉舞或將猴共勢
飢吟時與蚓同聲
若教眼底不識字
應已脫除窮困名

過湖口

野客西來意緒勞
為停征棹到亭臯
湖山氣象皆清曠
名利襟懷自鬱陶
曉市魚多腥萬鼻
晚波風健趁千艘
高情未有分張處
愁誦山移一兩遭

偶書所懷

鳳凰亭上倚層軒
桃李分香到几筵
曾與故人同一飲

試思前事已三年歌懽舊興知何在衰颺新愁祇自憐
縱使春風容病跡亦貪牕下枕書眠

奉和內翰太中建昌三見梅花

三見梅花似故人楚鄉春是洛陽春
蘸盃酒意枝枝重入筆詩情處處新
南野幽林尋去遠西園高樹繞來頻
無心草木窮山裏還解遭逢侍從臣

登滕王閣

韋君德政滿洪州去後無人更講求
帝子驕奢起高閣

到今連歲為增修座中簫鼓來無定檻外帆檣過不休
惆悵幽懷誰與問水長山遠總關愁

書邊

勞佚由來命不同悠悠身事幾時窮學能愛日終無補
愁解迎春却有功千慮漫游言語外寸心常在苦辛中
故應搏酒憐顚顚會借書邊醉頰紅

風雨

春來未苦狂風雨初見雲雷氣象豪合雜忽如喬岳倒

迷冥不辨九天高林巒偃亞傳雄韻溝澗蒼茫起怒濤
花卉一空何足問且欣餘潤入耕臯

哭鄧氏女兄

東田嶂下古荒村又向荆榛占一墳寒苦到今初是了
榮枯從此更休分棺旁乳女隨遺祿膝下亡男恨白雲
共係人間酸鼻事欲言聊復淚紛紛

淒涼三十六青春歎息從人只累身內外諸門方破碎
初終兩姓却沉淪平生尚未諳奢泰已病猶能強補綴

便向夜臺逢考妣應傳同氣各遭迍

答道先寄酒柴荆

江州雙耐到籬東快殺陶家寂寞翁
田野放懷容易老篇章寫意敢言工
漸生耳外燠烘熱轉覺盃間潏灑空
何必籃輿依五柳久來身世醉鄉中

己未上元宿崇相山寺

七十年華已半除新春猶復感窮途
腸便酒味雖如舊眼對花枝只似無
計畫但求閒次第文章知是枉功夫

滿城燈火笙歌沸獨訪東山宿佛圖

陪道先兄游麻源輒賦二小詩

借得籃輿便出城山光門外望西行
昨宵偶雨路塵少今日好風林靄輕
有竹人家庭院秀避騶樵客面顏生
溪田橋北駁鞍嶺猶記當年志未平

十五年前膽氣麤擬將文字換金珠
科場委頓成何事耕稼辛勤落晚途
累歲不曾言石磴居山空道有茅廬
今朝碧澗潺湲響若不因公得聽無

永定東軒望淨土芭蕉

高叢獵獵畫簷西曾聽寒聲慘淡吹午枕有懷疎雨後
夜燈無語惡風時二年成別應多恨此日凭高動所思
人世不堪謀慮遠眼前容易得傷悲

過游源驛

游源驛裏壁間詩去歲經過一覽時客子面皮真鐵鑄
閒人公論是靈旂有誰謔浪慵開口只我哀憐為斂眉
多謝縣侯新蕩滌從今莫恨放行遲

池塘

池塘春草夏仍多，更照層林發翠波。
到處風光長好在，座中愁客奈情何。
眼隨高鳥尋鄉思，手把閒書養睡魔。
誰使早蟬能觸撥，新聲來與斷腸和。

次韻濟道見寄

君作王官傲衆儒，尚逢廊廟有為初。
塵中白日雖牽逼，筆下清風肯破除。
欲去定成賢者隱，未歸嘗與俗流疎。
人生到處隨榮願，何必江湖勝漆沮。

追送城東但立談當時惜別恨駢驂一封消息難頻到
千里傾思尺坐諳知有才謀當奮發豈於州縣却悲慚
為文尚喜多餘暇寄我新詩似渭南

過莊子祠堂

堂以嵇
康配坐

客過蒙城日欲曛更尋祠館拜遺真文章昔已悲哀世
香火今誰望俗人諸子異端爭土苴千秋餘亂見緣因
祇應叔夜輕狂輩未是先生入室賓

奉寄蕪湖征局都曹

不見銅陵唱和翁相望三度歎秋風
商量難得樽罍共存問空煩簡札通
驢上閨仙邀苦思草中田子建微功
明年官滿當攜手未定韓郎耳便聾

梳頭見白髮

未老先斑豈自由可憐蒲柳易驚秋
不緣遷染應非俗若有梯媒必是愁
老蟲縱嫌相間別素絲何害共風流
塵勞興味吾諳盡肯似豪人諱白頭

黃九游河州

黃河東背賀蘭山迴望塵沙萬里寬土地久傳戎種姓
人民還笑漢衣冠軍中意氣誰先得史上功名我慣看
何日歸來談將畧轉吾愁面入忻懽

六月二十七日醉書普安院壁

酉尋行甫戌已見夜候顯翁朝乃來隔樹鳴蟬休聒耳
滿樽浮蟻且銜盃多憂莫道無由解一醉從初不用催
傳語羣書未乖間只今相憶尚須迴

題河源諸兄壁

不見諸兄十載稀重來問事只傷悲一家未有中興地
兩地皆成永感時道在莫虧清白業力微空賦鵲鷁詩
吾門舊慶天如報會向層霄得桂枝

將離東洲書社留題屋壁

偶向林間寄病軀七看圓缺印蟾蜍何言霧隱南山豹
只得人憐涸轍魚衮衮光陰添一夢勞勞精幹落羣書
揚雄若有閒名在此地曾經寂寞居

將歸南城書內樂堂壁

野客辭鄉道轉孤，祇於愁上進工夫。
乞衣借食虧豪氣，弄筆翻書滯壯圖。
三徑未成真隱約，五窮爭現主人迂。
南歸漫過庚桑國，不得留參鞅掌徒。

已酉歲歸省松楸過武陵翁所居留書屋壁

千里歸來儘苦辛，見君依舊自由身。
始知絕學無文者，勝却翻書弄筆人。
案上方經閒白日，門前車馬漫紅塵。
半軒風竹一樽酒，冷笑世途爭富貧。

欽定四庫全書

灌園集卷六

宋 呂南公 撰

七言律詩

憶西村

東岡西下古墩頭草木風煙事事幽
畦壠彎環延果菜
筍簍參互獻魚鰕
常開夜戶誇無寇
競撥香醅賀有秋
願定此居猶未得
豈堪僥倖望公侯

鍾南平祠像

天祿空虛土運崩匹夫徒手起攬槍還將有限驍雄力
換得無窮跋扈名已是用心貪禍亂尚何顏面見昇平
丹青此日凝埃色尚似憂慚問罪兵

寄黃夢授機宜

少年秋賦險橫飛晚去從軍脫布衣只見鄉評推孝行
豈知俗效在兵機黃雲古渭邊烽斷春草臨洮戰馬肥
了取功名上麟閣莫因畫錦苦思歸

得唐彥迴篇再寄

手把封題又慘然坐驚新句俊翩翩窮通可是俱關命
聚散由來亦繫天此日未逃衰俗口幾時真及古人肩
一樽酩酊難頻共况望青綾被底眠

聞唐彥君益作計相過先以此寄用前韻

見說東征計決然夢魂迎馬去翩翩遙憐迢遞荒村路
幸對溫知此日天意厚但青貧友眼裝輕肯赤僕夫肩
書編酒盞蒲團坐預擬中宵未放眠

緘題道先詩句尚多未和酬者因書短律奉寄

已作醉鄉貧戶限更逢詩匠惡穿裁王弘一耐何曾送
崔立千篇不住來枕上精神難託夢牀頭卷軸易成堆
賀蘭溪上如歸去省得衰翁合勺才

寄鄧師厚二首

茅屋分攜但偶然蟾光今已十回圓自存交分長長在
不用音書疊疊傳無術入時猶是命有身多病豈非天
勸遊已作南歸計只待槐梢沸早蟬

庾嶺前頭梅散漫瀟山東下水灌漑二年時節俱為客

千里家山各未歸
俛睨游從真醜謬
方頭言論易乖違
人間勝事知多少
專把淒涼屬布衣

金陵寄示亨父

東游西上但差參
寒餓催軀失本心
多難有言悲運命
厭貧無意惜光陰
窮通未定功名主
疾病能將少壯侵
故國漁樵應可入
寄聲先為問雲林

寄亨父

當年勇慕古人風
坎壈無由到澤宮
力命不容相鬭競

金部人二
卷六
光陰從此便和同身如孟氏兼三樂家似昌黎厭五窮
莫為明時頗惆悵著書亦是濟時功

再寄亨父

匹馬辭家臘雪初二年名姓入銓書熊罷帥府招韓愈
邑里經筵失仲舒穩把聲榮收雨露冷看交舊厭溝渠
藍衣定有誇鄉日為到耕村問溺沮

奉寄子發

春雷動地竹牙生社雨淋岡歲臂擎田野盃盤容我飽

牛羊鼎俎為誰榮能無智慮隨天轉未有工夫與俗爭
苦憶南園江健令解於忙處用閒情

解於忙處用閒情絕口多財與美名剝啄至門方就枕
畢逋歸樹却催耕燒香事佛人俱佞曳屣歌詩我亦清
筍蕨又芳春酒列相思何計可同傾

戲題白鶴觀

遼海沈沈信息稀蒼松枯盡草侵扉樓臺有字知年歲
城郭無人辨是非像座風輕蛛作網醺壇春老蘚成圍

道翁久蓄瑤琴意莫為閒名取次揮

南豐道中口占

冷雨迷濛懶舉頭望中恐得故鄉愁
梅經舊臘香猶在水被東風凍已收
鳥喜春和紛格磔馬嫌泥滑轉夷猶
人生祇有安居好可奈安居不易求

野菜

采采新英出遠岡生香不斷冷垂漿
地神手老皮先紫山鬼腸飢色更蒼
野饌自宜清品味世情誰識淡馨香

舊林春草盤飧慣憶共隣翁踞坐嘗

秋堂

秋堂燈燭夜輝輝照我書邊淚濕衣何術更堪圖愜快
平生已是足乖違悠悠客路和愁往杳杳青山借夢歸
蟲響風鳴俱有恨驚殘二十七年非

過列岫軒輒題小詩

檻前清沼一奩披牆外橫山百馬肥長使座中知爽氣
豈煩天際問脩眉留賓出酒人皆喜不語看雲衆未知

饒借俗儒譚爾雅主公偏重謝家詩

贈叔憲

軒昂不肯事雕鏤放却名韉已十秋舉世有為皆負累
百年無悶更何求長驅好意歸吟筆笑領真風貯酒甌
嫌我生涯非獲落紙編寒夜困燈油

贈王九

李杜是非張相國曹劉忌憚呂將軍異時各有凌人氣
此日何妨負我文議論當如山頂石光榮會似雨餘雲

恨君不悔邯鄲步希世功夫枉十分

塵土

塵土營營自滿城此間賞望四時清
朝看雲樹吟天末夜對溪光醉月明
只見漁樵真氣象豈知塵市細紛爭
座中更挂庸兒榻未識冰壺有舊名

道卿上人新作塔亭准擬壽終乞余題詩

道人八十轉康寧却似浮屠起寢亭
日月無窮終繫數乾坤有壞亦因形
未張雲鶴蕭蕭影先養松楸鬱鬱青

究竟會應逢逸少為師重勒雁門銘

寄觀上人

袈裟初帶帝城塵便詠南陔望白雲賈島未為窮主簿
湯休何事小參軍古書似我閒千卷山酒從誰盡十分
正是諸生薄韓柳勸師絕口莫言文

寄上山陽太守屯田

故國無田只一瓢儒冠相誤感萍漂虞翻骨相終屯滯
許劭題評漫借饒已養道心忘貴賤故應榮分任漁樵

文章解頌賢人業更坐看君立九霄

獻翰林太守

欲辭鈴閣重徘徊世路無人計實材賓榻少因高士下
醴樽多向俗儒開孤蹤此日叨餘論直筆他年倚上台
召節不遲天陛遠輟耕朝夕為公來

和酬道先高秋見寄之句

眼看金菊木芙蓉想見嚴城此景同儒術凋零歸故紙
歲華催趁入衰翁千秋治亂三鍾酒萬里關河一畝宮

南鵠北鷹方得志更誰迂闊問哀鴻

晚出壽春

馬足遲遲破曉霜朔風迎袖過川梁
簾櫳幾處迷醒魄煙靄滿空含曙光
已是途程規進取可能懷抱似鴻荒
平沙莽莽兵戈地却為千秋起弔傷

書齋春日

花困蜂鶯柳困風年年春恨渺無窮
已添病格憂詩債未破愁城憶酒功
日月正居勞苦上山川長在夢魂中

游鞍賞席今多少想見濃陰替亂紅

和酬李宣德二首

銷閒堂上日何思或弄鳴琴或賦詩聲正只傳心靜處
篇成不待燭殘時隆中有客吟梁甫洛下無人說克兒
此日餘音到逋客定如醫藥蓄青芝

臨邛大邑少鴻生初敬多辭馬長卿幾許分財來滌器
不如收迹去躬耕生前遇主無高位死後遺文有盛名
畢竟負他賢令意被人傳說是閑情

次韻輝卿感春

日日春陰共慘然，愁懷不稱艷陽天。
已從魯酒迷醒枕，更向瑤琴怯武絃。
往事自驚千里夢，勝游誰犯五更煙。
因君解道花如錦，始為芳菲憶去年。

再和

欲寫春愁上粉牋，只疑幽思恨遙天。
塵埃漫蠹霞書字，日月終虧錦瑟絃。
夜聽子規歌醉枕，曉看新燕立疎煙。
冷灰殘燭相遭慣，觸撥東風不記年。

再和

聞說羣芳初滿園未能尋賞恨參天風豪雨橫傷鶯蝶
酒冷詩荒負管絃屐齒有時臨薜徑馬頭何日破晴煙
誰何贈我寬懷語每道新年似舊年

熙寧六年再至鄧氏北軒感而書壁

窗扉暮闔曉還開乞食寒儒去復來土木不妨人冷落
詩書能使客低徊言如鸚鵡今徒爾宿似夫不亦得哉
但識浮生皆寄託莫從河漢論涓埃

寄從義法曹教授

軍學先生骨氣清每嫌盃酒亂襟靈譏排只是攻三雅
熟爛除非是六經榴榼日虛塵拂拂兔毫宵運燭熒熒
俸錢添得真何用好贈滎陽買綠醕

奉酬范十七見寄二首

接人坐語送人行兩飯逡巡晚鼓鳴遇社有何歡次第
過春多是病心情消磨白日無云補計算流年但暗驚
苦雨寂寥還一醉夢魂依舊背嚴城

一紙新詩入北城
起予聊復醉魂驚
低心苦淡吾徒事
轉眼炎涼此世情
六月未須論止息
三年方看大飛鳴
錨銖社肉休過問
幸有鰕蔬且爛羹

再和

浮桁門外樹如城
歸路迢迢夢易驚
嗟我衰遲從旅食
感君存問有詩情
牡丹不在儒宮種
杜宇偏當靜夜鳴
勞費主公憐苦淡
駝蹄時勸一盃羹

幾欲相尋出郭行
念君家雁不能鳴
逢杯得醉常常事

漸老多慈種種情在再又聞寒食近牽纏空作暮春驚
祇應已入東風笑愁思長於萬里城

次韻酬亨父見寄

時亨父在
厚平山中

醉墨淋漓詩屢酬浮蛆上下酒新篘人生有此自可樂
世事無窮何足憂端是覽輝同鸞鷟不應專宿傲夫不
嗟予久負思山興空得公詩展復謳

和酬天休

故人邂逅早驚時一別經秋燕盡歸已是苦貧看客懶

更堪長病出門稀何曾富貴來如夢但覺光陰去似飛
欲酌清樽相解釋莫嫌窮巷瓦盃微

酬何威中

十年經畫鑿坏逃只為乖違不為高盡力未能成飽煖
致身那解立勲勞已從酒盞忘千慮羞看貪人校一毛
游舊惟君尚相記每將新句訪耕臯

和酬伯華

襄陽耆舊足高風不識州城有德公器業我應居衆後

姓名今恥達宸聰文章末技知何用衣食殘年嘆屢空
朋友贈言當儆戒恨君虛美一篇中

道先賢良以其到郡未及相見遽寄四韻謹以

酬之

山人還是入閨闈自笑窮心失本初鄭相舊憐窮禦寇
秦王新伏勇相如衣裘破敝身謀拙齒髮凋殘世味疎
人正棄捐吾獨取似君風誼更誰歟

酬次道京還見寄詩二首

會得吾生只汎浮，莫將耕釣異公侯。
文章高去乃青史，富貴極來皆白頭。
至樂如今惟強飲，最賢從古是無求。
荷源磔上楓林葉，又過元豐第六秋。

平昔賢他馬少游，有官何必至封侯。
天如大雨當揮手，命合高眠亦到頭。
幽澗魚肥堪煮炙，豐年酒賤易追求。
恨君門館無酣伴，枉共癡兒對一秋。

酬西閣書事

西山閣上綵衣人，過得三冬似九春。
長恨作詩無客和，

更緣中酒被妻嗔有官未入功名境多暇仍思寂寞濱
文雅一時傳萬世却應能此是榮親

朝曦閣詩為李道正賦

道人開閣破東廂慣看朝曦亦坐忘但見長時似車蓋
不知何處是扶桑雲歸後崦陰無迹水過前渠響自忙
雨露縱然能惡作未妨微白到書牀

至凌雲山却寄平仲

建業歸來路二千一舟輕借死梯緣貴池亭下風如鼓

采石江頭浪拍天險與陽侯成憤友幸從魚腹脫腥涎
只今親舊知憐否尚有餘生亦偶然

九月七日偶書

愁裏光陰不覺忙忽聞時節近重陽絕無閒樂擬衰疾
纔檢舊衣防早霜未必此生專冷落漫因往事巧思量
呼僮閒賞籬邊菊併括憂端付一觴

伏覩教場後庭新移梅樹輒賦小詩呈獻內翰
太中

中庭移植氣蕭蕭
無數芳華壓翠條
田地縱然非舊壤
冰霜猶可見孤標
人間歲月何曾老
物外馨香粹未銷
故有明年佳實在
釧羹滋味看和調

聞仙都李道士下世

布褐毛冠七十秋
為誰浮汎為誰休
但曾計日防三鬼
不慣攜琴謁五侯
詩卷在前聊養目
酒尊從此罷銷憂
七星杉下朝曦閣
香火應教弟子修

長憶初能戴幅巾
仙都門外學游人
科場未數金門賦

襟袖空餘紫陌塵。平世選賢終法令。暮年如我但寒貧。
惟師不信文章誤。只道遭逢有屈伸。

九月霖霖穀欲登。稻芽連穗水漫塍。無方解我心愁寂。
更欲聞師近寢興。紙尾忽傳成異物。棺中還恐已飛昇。
羲和睡熟泥塗惡。絮酒尋澆歎未能。

寄江州沈尊師

洞天一別七春風。長夢桃花爛漫紅。不得雲雷相借助。
且因文學守貧窮。曾尋物外無窮意。已覺人間萬事空。

便作野夫纔是分只嗟凡骨誤仙翁

五言絕句

橘林居士題載溪館壁

雲凍月籠影風生水澀寒故人真似雪何必到門闌

七言絕句

寄茶李侍禁

東塞將軍日月閒五兵不試坐雲間却因睡思侵書卷
送與茶甌解壯顏

過虎林渡

淮南行盡到江南
野渡風高送晚帆
五五長亭莫回首
向來窮淚已盈衫

戲題白鶴觀

八月風高宇宙清
銀河秋浪到天聲
門前合有仙槎過
會待參隨上玉京

戲題妙靈觀怪松

二十年前看怒龍
鱗鬚半已召雷風
至今未拂層霄去

可是懷文與我同

曉雨

曉雨彭彭發舊泥
田家拆壁備朝炊
無數星辰一輪月
夜來空似欲晴時

重過福興院

重過山寺借牀眠
屈指前遊已七年
文字轉工身轉困
被僧相問却悽然

乞錢謀食總悠悠
兩事平生話亦羞
何意茂林脩竹下

今年還得一迴遊

和道先雨中栽花

二月前頭雨意迴
移花趁雨破青苔
芳根得地春工敏
定有新英次第開

旋封旋築帶霏微
贏得澆瓶不用攜
衆草自今常避地
主人來繞漸成蹊

題藥錄

華佗氣絕釣臺側
扁鵲墳荒浚水邊
末俗好財無妙智

此書何日似魚釜

茶鐺

宿榻蕭蕭午戶開
松枝火盡半寒灰
主人欲就遊仙夢
休願煎茶醒睡來

風雨

風雨蕭蕭夜漏沈
北窗燈影見傷心
從今莫更言滄海
只合思量此恨深

有見

賣藥諸生體調狂塵埃空助老來忙壺中自少閒天地
豈是令無費長房

曉日

曉日瞳瞳上紙窗小爐文火近縑綃衝愁滿盞扶頭酒
笑殺醫師第一方

詠白髮

人言華髮是愁功不分悲傷得老翁亦有不愁頭自白
可憐功過略相同

已任蕭衰潛似雪何須輕脫便隨梳不及窮愁索長遠
一生相逐未相疎

偶成

冉冉新青上草頭小庭春色強悠悠酒酣虛臥琴絃暗
眼見風光似九秋

新室

為姦只是疑王涉至死何曾識杜吳四體早知成散漫
前年悔更染閒鬚

魏勃

雖發齊兵未不臣問時何用便銷魂
一生才勇都纖小
可怪區區掃相門

禰衡

世亂無人及禰衡眼看豺虎似蚊蠅
喬玄荀彧皆儒雅
至死何曾曉愛憎

覆船山

山似舟航壓衆坡靜為平地動為波
桅檣不藉瞻烏首

爭奈風帆百尺何

過武陵翁題其屋壁

十年騎馬走紅塵非敢求為富貴人只願似他龔處士
不餘不欠一閒身

綠竹林邊白髮翁面顏猶似壯時紅朝來賣藥錢多少
又閃間愁入醉中

廢井

清不能常濁有餘轆轤音絕甕苔枯荒涼欲就羣蛙問

今有觀天坐客無

見廣度院紫荆一株先開

滿樹新英待發時東風先動向陽枝同根若是生疑怪
為道開遲謝亦遲

蘭溪驛

驛亭何處近蘭溪行盡蓮華日暮時春雨發香無分見
斷腸頻誦杜郎詩

惡客

薛許昌集有好客篇
故作此以擬反對

惡客無端捨舊山坐令千慮險相關青燈白日貧兼病
聽著農桑更厚顏

野客

擬歐陽詹

野客來過洞府門天風吹斷去時魂得歸應被鄉人笑
衣上雲霞有異痕

酒客

酒客胸襟亦自賢平生不斷醉因緣望見青帘涎已活
誰能顧惜杖頭錢

夜擬李義山四更四點

四更四點露成霜
箇裏愁人暗斷腸
鼓角未喧聞鼻鼾
北風窗戶月荒涼

反李義山人欲篇

藥囊易中荆卿背
匕首難傷趙政胸
燕國無辜竟魚肉
可能人欲有天從

題圓上人宴靜軒

宴安深靜屬居僧
一炷檀煙萬慮清
猶自笑他簷外鐸

風來未免鬪鳴聲

客到

客到空齋說早春
嫩紅輕綠漸紛紛
寒人不預尋芳品
多謝東風許聽聞

答內翰太中觀插稻見寄

睡過春深一月餘
綠秧黃犢負村居
東風似恨歸耕晚
故遣蓊牀日枕書

楊朱

戰國功名尺寸勞先生持論異吾曹
孟軻解辯承三聖
後世誰曾拔一毛

陳都曹座中出示諸公曲詞以四句酬之

看盡新詞聽盡聲未能高和耳徒傾
聾身縱作岐山老
爭得聞他彩鳳鳴

真輝閣

會得真時真亦空
光輝何足更流通
勸師不用嚴標榜
稽者逢燈與暗同

安昌縣侯

能說齊論與魯論世儒希合便紛紛何曾後學皆傳信
只有姦名萬古聞

小檻

小檻幽花已破香此心無處避韶光年年惡作傷春客
穩為東風細斷腸

楊八送筍以四句謝之時在湖口

殺却盧家十五龍野人盤饌當時豐湖干少得中林味

此日鄉心轉不同

詩餘


調笑令

微韋蘇州作

行客行客身世東西南北家林迢遞不歸歲時悲盛淚
垂垂淚垂淚兩鬢與霜相似

前調

華草華草秀發乘春更好深心密葉紛紛妖韶隨處動
人人動人動公子王孫情重



欽定四庫全書

集部

灌園集卷八

詳校官庶吉士_臣陳若霖

侍讀_臣孫球覆勘

謄錄監生_臣卞爾巖

謄錄貢生_臣劉錫珪

欽定四庫全書

灌園集卷七

宋 呂南公 撰

議

追難皮日休鄙孝議

皮子作鄙孝議一篇疾時之剔股濟親及廬於墓者後
二百年余讀其文復病皮子之不強於道也造語以難
之難曰孝非淺狹之道也大推之彌六合不能限小存
之尋常方寸亦足以與之經曰聖人之德何以加於孝

乎非莫大之謂耶用天之道分地之利是亦為孝非小
存之謂耶蓋聖人之明孝以報也主之以愛恭不礙其
迹而特原其心心苟有在矣不必科其所趨也古之為
孝者多矣其時勢迹狀艱難平坦未嘗一轍要其所歸
惟愛親而已矣奚必聖人開以如此而後行之乎今人
能哀其親之疾苦而憂窮無策於是剔股以進焉此豈
以無益望其親哉用父母之遺體濟父母之危命經雖
不言然未為不道也若曰吾身可寶而吾親有命則悠

悠世習誰非頑忍耶雖大舜曾參苟其親病苦而有以
此告亦必為之矣二人之孝應不繫於避杖而漢景之
不肯吮癰亦未足賢也凡人之情便安佚而畏煩苦世
衰而教不振者久矣民之無良有生不能養而死不能
葬者為人上者取寸心而勸激之猶不足以懷動今有
人哀思其親不足而從之夙夕於草樹荒涼之間諒非
偶然必又禁之是愛親者反得刑也夫剔股甚痛而廬
墓甚不便也人情顧近而忽遠安有快於瘡割利於野

處而直幸悠悠之旌賞耶萬一為之而上之人不卹則
其人亦將遽已耶天下之姦頑冀倖者時甚不少儻令
剔股廬墓皆主於邀名免徭則其剔且廬者奚其不紛
紛耶若人之心固易原也原其心而不害雖聖人出固
亦與之况經語哉惜乎皮子之隘吾名教而欲禁人愛
恭於親也

論

經行論

經明行修非相因之事是以古今講授之士雖以傳解
顯聞而有不免得罪於名教者也漢以來學經家衆矣
顧違行則猶多董仲舒號大儒而下流穢厭類巫覡不
自羞至推災異險受禍乃吞聲而絕口劉向燒金幸寵
罪延其父鄭康成八十不葬其親孔光張禹曲說卑意
亡國以存家戴聖見糾不法范升廢於出妻馬融驕奢
王弼躁急賈逵附圖讖以希貴顯祝欽明誣周官以媚
祇后劉歆助新蔡邕懷卓譙周致主於興襯陸贄效鷹

夫於叔文是皆內不令於身外不祥於世清議之所投
竄而學者之人所為共羞而數君則為之夫豈經之所
能救哉蓋學之於人所以輔益其器資器資或陋雖力
於學亦安能保其措置不涉於小人譬諸染然同是朱
藍而入是則各有分繪之入不異廢之入而廢自然賤
繪自然貴貴賤豈色之預哉而論治者或稱行修出乎
經明吾詎敢信且數君之學皆世用其書不可闕者而
行已若此彼其學數君而不就者其有過而可羞誰能

計之謂明經人為必無罪焉吾終大笑此論耳夫明天下之善曰德而德之所成有吉凶當天下之務曰才而才之所設有邪正維吉以正故賢人君子業履所以全維凶以邪故數君所以不免於過惡豈數君之願哉主於中者無以勝於外之所行則經亦何能予奪於其間但聖人之於教不欲引己望人又不欲駭以所不及是故存經以為輔性之本使之上智益明下愚或畏雖然終不必以經為母而行為子為其吉凶邪正之所自成

設有不齊故也蓋古之人有經行兼長者矣然而非實相因也負可貴之器質而成德於吉設才於正焉則如薪火之遇膏有加壯而益揚而非俟膏然後為火也語而用此則聖人之意與士之所兼非實相因蓋亦可亮矣嗟乎吾安得若人而見之

以孝事君則忠論

道之在人莫不資之以得其德成其行然而得之未必能不汨成之未必能由序是故天下之名有生於不足

而實之所受有非因於有餘而性命自茲爛漫矣蓋生而知之無待於外之學所以著愛親之心也推吾致愛之道以自盡其力則得名於孝固裕然矣是之謂不汨義無施而不宜則行無入而不出移吾致養之勤以效於職業之官則得名於忠其必然矣是之謂由序經曰以孝事君則忠以敬事長則順豈非謂其不汨而由序者歟蓋天下之治待政而後治而政之所舉待人而後明則出身以仕於當時何可以不蘄其能竭心思此忠

所以見貴於人臣之節也夫唯能竭其心思則力所致不擇事而安之唯其稱而已矣夫既出而安之不擇其事則其未出也必亦不擇地而安矣夫非明其固有而推之不奪於物修之不喪於怠則安能移不欺之志於黽勉之次乎傳所謂求忠臣於孝子之門者以其得於天者能定則立於人者易以成序故也先王之盛時作德有教而天下之人材小以成其小大以成其大於家無或不理於官無或不忠則士之履籍名不足以標

之蓋人愛其親各敏其事則孝忠誰與爲異及夫王迹
下熄禮義之澤稍涸而後名生於不足矣雖然從事而
不敢告勞念靡盬而憂父母至於陟岵岵以思望歎稻
梁之不藝則人之内性非其外之必能滅可知矣事親
之至不異於許國而公義不以廢私恩然也惟其有內
之實不勝其汨者之多則誠衰且漓官瘵職曠其上自
不能信操藥以進慈父其色焦然而聖人以爲羞而陳
蕃江革之徒方以獨高取名於世其遠于先王之盛又

可知矣夫資道以成其德性命序於日可見之行此理之不易而事之易爲者也而何曾王祥孝足於父母而忠不足於舊君則利之喪真亦可戒矣

序

韋蘇州集序

初余未讀韓退之杜子美集時適讀薛許昌鄭守愚詩而嘗讀韓杜者以余爲笑謂其讀之卑也方是時余遭笑賊且自恨不識夫讀之入於高者奚獨人能而我頑

莫入者何故其後余年二十三始能讀昌黎文又明年亦讀少陵詩矣而間以論於人則莫余明也時又自悲以爲余真用愚見外於人哉則又疾焉以求異時更讀孟東野王摩詰張文昌李太白等詩迺至汎讀沈宋以來至于晚唐詩人集本焉人雖漸不笑吾卑然往往怪之以爲是無益於進取者何必困眼最後讀松陵唱和編則復見笑於人余於是而洒然損愚之悲亦不復論知昔之笑者未必識其卑而今之笑者未必在於高其

怪者亦不足問也夫入宮者自坂而門自門而屏自屏而庭而廡而階然後堂奧可至今不容薛鄭又笑皮陸而特喧然稱韓杜之高此何以異於不涉門庭而已至堂奧者耶諒非鬼物恐不能至也未之至而亟以爲言豈能得其所言乎哉甚矣人之不足尤也所見之不明而務因稱傳之顯晦以定論學之高卑其亦不思而已矣安能笑人熙寧三年予歸自建康始讀韋蘇州集於舟中愛而歎焉嗟乎蘇州已能使余得怪於人矣庸

詎知苟無欲笑者耶然予既屢聞而駭恨矣書予所遭於衷方以自憐云

送葉著作序

熙寧二年夏某歸自淮南將至故園隣境之鄙人有迎某者言若將爲賀而不果言時怪而問焉徒曰儂欲有賀於子然患辭之不勝也子亦行當具見之矣入邑則所見居者安行者肅有知者談無識者謠皆曰天畀特厚於吾人今得賢大夫矣問其所以賢皆叩額曰無傾

河之辯與通幽之智亦何以壯我大夫之美維予亦徐而察之得矣奚言之俟於是某往拜大夫焉初瞻公門蕭乎無故時之紛紛而有未嘗見之肅肅已見大夫則淵兮泰然終日不睹其懌愠之容而持評文學引諭開擊如不足者私獨怪大夫之臨冗劇而不失雍容則以爲其緩於聽斷也又竊視庭廡則將事者不諠被罪者色泰縲有塵械有菌鞭挺稀鳴而勃詬已平吏胥不勞而契牒已理出而觀於鄉則塗相謝而室相慶者又多

多也則又問焉曰爾之謝且慶也昔者莫之爲而今則爲之其何以乎皆曰吾負大夫大夫以仁恕禮義治我而我曹不令尚或爭焉今吾慚是以謝之其慶者亦曰信吾父祖之言如大夫之賢非特未之見實亦罕聞今吾得身見之奈何不慶於是某亦歎嗟累旬不能休是以讀循良吏傳十餘年而不意親遇於今日又不知其所以致此何修而吾人又何幸得此也是年之冬復以事走京師比明年之秋乃歸至則又拜大夫焉凡前年

之肅者安者謠而叩額者不諠而色泰者平者理者與夫塗相謝而室相慶者皆仍昔也獨觀談者有感容時又勤而問焉乃曰天雖畀吾人甚厚而特不以久今吾大夫被勅書當移官於蜀去有日矣吾悲焉顧末如之何是以起憂某曰何爲其然蓋亦理遣而已矣天之生賢也理不專爲爾一方閩吳燕蜀中土之人其誰不願得如父母者爲之長然願而得者幾何今大夫之賢而既知爲難有且以爲雖吾父祖皆未之見而既得之夫

豈不幸固欲戾天理以專所願乎大夫之賢其美利在
而身其無窮之傳惠而子孫孰使而子孫所逢皆得賢
如今大夫者耶今之大夫既在而所得蓋已無憾即無
有焉則是而身之幸已上越父祖而下過子孫矣獨何
爲窘窘於所未如之何於是憂者稍平因曰子之言然
其爲我叙而次之以慰我難忘之思亦書以告大夫使
知吾人之樂愛焉可也某曰慰汝而次之言是已若以
告者毋乃非大夫之意乎皆曰是何傷乎仲尼之不見

敬於鄉隣也千百世之後人莫不譏魯人之不令神龍
丹鳳之爲祥慶苟有口者莫不頌而美之未聞龍恥而
鳳恚也令吾人樂愛大夫而得怒焉是誦甘棠之詩者
可褫而讀循良傳者皆可撻矣大夫必不然吾子其文
之某曰然則吾文不足奈何皆曰不足則爲之何害於
有意以不足而遂不爲是吾子與隣境鄙人無以異矣
某不敢復辭即具書之并贊大夫之卓徒云

傅巖字夢弼序

學聖賢者學其內而已矣若夫軒裳祿位何足慕之有
其內而外者至焉審之義而宜觀之時而合君子於是
受之有其內而外者不至君子蓋不卹也顏淵欲爲舜
豈主於百官牛羊公明儀欲爲文王豈主於三分天下
有其二孟子學孔子豈主於魯司寇揚子比孟子豈主
於齊卿然則君子之慕古聖賢名實可知矣吾鄉學者
傳巖其友字之爲夢弼蓋勉以輔佐之器業云爾豈可
以空疎無有者爲哉勉之遠大其內也字之固當而或

人譏其虛喝以爲傳呂之事非布衣書生取次所能享
嗚呼此論外而遺其內慕其德而折巾角之流也何足
傾聽巖與余待試於浚都亦同館舍嘗以其字之疑道
焉余爲之說如此巖因請爲之序是歲熙寧三年

送傅亨父序

自史館公在中書蒐能而餌善天下之士尺寸之長細
大各伸方患無有不患莫知方患未知不患莫用譬如
貴豪張宴其筵十里有豆如山有尊如澤有座如陣味

無品而不薦樂無工而不陳當是時賓之上者以賢其
未必賢者以親其次以附以倖以役大之有笑歌獻酬
以備福祿小之有筐篚幣帛以給沽丐不在是者身以
爲歟人亦以爲宜棄焉嗚呼熙寧之盛蓋如此遇豈易
哉而比歲之冬南城傅亨父始摩髯欠伸有必出之意
自言坐書邊四十年窮鉛竭丹吟口渴而捉指疼八十
吾親而三十吾子尚無所遇正獨困於雕蟲之有司耳
若今科衆路多人各以所負致其聞達我則不能强行

非聖人之訓學者之事朋舊聞而壯且是之呂南公曰
速乎夫子之運踵也吾聞士之學道不貴乎以己忘物
亦不使物忘己己忘物則不仁物忘己則非有德夫見
忘於物者世之謂無能之人而夫子寧固處之雖彼忘
物者尚未果賢或者本無能而借高以自幸爾從者審
非不仁又實有德而直樂於退藏吾又有說必令志局
異此則人俟時乎時俟人耶自古傑人俊士所以功名
成遂蓋棺無餘恨者亦各會時而已矣以夫子之所有

解括而露懷上可以聞于相君旁可以請援於故知之人得無遇歟夫遇有大小我所不能知所可知者豆尊既展聲味既給不在乎賓之上亦宜在於其次不在於獻酬亦必在於沾丐爲夫子計惟亟進勿緩毋使身出乎投轄反關之後而銜歎棄之悲耳於是聞而壯之者皆曰信然盍相與賦詩以贊其行某既爲之賦又序之以俟其所遇時則四年十一月之丙申

思亭詩序

余欲序思亭詩執筆而歎已歎而嘉蓋孝思之爲德其
取名甚美而致實甚不難然世之人率難于不難以自
棄于馬牛既自棄矣又迴首于美名銘乎其心其最無
恥者則斐僞熏馳盜取經傳愛敬其親之辭開屋而榜
之幸自標飾夫若人者只欲勝馬牛于毫髮之差其安
可得蓋馬牛去離衣冠又未嘗盜經傳之辭以自欺且
用欺人則雖不足于孝思不猶可恕哉嗚呼余飽於恕
久若于所嘉則未之頻煩今而值於江君是故先之以

歎頃嘗聞之江君喪父不但依于禮而又深長其情于
祭葬凡以自盡而哀摧念慕日月愈久而愈憂未至也
因葬已而爲屋于隧前與其仲季宵晝于其間以致其
思感涕之餘講讀先生之遺文曰吾親昔以是飭我者
也不敢忘治其田桑以足衣食之奉曰吾親昔以是爲
之家者也不敢隳命其子孫誘之戒之母不令曰善慶
有先莫之思而紹者爲取誅蓋如是者至于除喪矣而
屋未嘗命名焚衰之明年邂逅余而及之適言親之于

子也愛無窮則子之思親亦豈有窮爲之祥禪之期節者禮之名文云爾感德思報而罔極者人子之情烏可已哉吾于學行思率吾親之訓以成吾身於四時盱衡想繹吾親之聲容以永吾懷于展墓而徬徨則思夫親之所以位此而昔同仲季之所以留此者何緣乎歸而述吾所思以鐫勉于所臨也故初題隧前之屋爲之思亭蓋所以深長愛敬之情若夫美名吾安取也余謂江君其勿固于謙天下豈有決于致實而疑于受名君之

所致無所避於嘉矣亟歸大其牒足以識君之意并錄
余之所歎于壁以懲艾夫馬牛之徒若嘗爲詩者過焉
爲謝之曰毋苟以章句媚人而不審諸已可也江君字
子儀與其弟子發皆以進士薦于鄉而子發先及第解
汀州司法執喪于亭熙寧六年正月序

豫亭詩序

潁川陳君益既一新其居宅有亭在堂之左而以豫題
其楹他日爲余說其名豫之意曰豫也者人情以之爲

悅而莫不同喜者也。然知喜而不明所以爲悅，豫之道則亦有時而不得其所喜焉。而或者因以豫爲不可常其亦過矣。蓋夫萬物之兆象也，時各有所用，有所用者所以輔資于人情，迺今不此之察，則以我而赴物，其爲流連荒亡孰禦哉？故吾之所以居豫者，不以物用先我者也。吾如主物如輔如是可矣。吾講有禽，吾尊有酒，吾絲竹有音，吾架有書，吾壁有琴，吾局有碁，吾園有花木，吾池有魚，可繫可醉，可聽可讀，可彈可奕，可翫可釣，無

非樂事顧吾不以在意則彼未有能起我者吾固不以物象而先我也是所命亭爲豫之意又曰人之不得所以居豫之道也因其莫思而已使嘗思之庸有不察吾亭之內有齋吾于是而燕休且以嘿題之蓋嘿者吾之所以思也如之何余聽君益之言而不能易也亦曰嗟乎允矣歌吟斐亹之士新與留辭詠于壁間余爲叙次其題楹之說如上

陳君益宅觀假山序

上豫亭北顧其牆廡之間小山叢然面南如畫幃者即而觀之工之素繪所就也而幽致乃不少凡其爲山枝者爲峯頓者爲阜灑者爲岩崖捍者爲崗嶺攤之成阪衍之成隰竇之成洞陷之成谷有鳥道有夷路有裊繚之徑有邐迤之坡而交聲蟠勃變狀總總又引自牆後穴而灑之流乎絕壁之前垂爲瀑注爲潭平爲谿析爲渠逼爲陂如是者又多態其間列茂林突枯植渚沙磯石層雜附見乃至人物諸類皆在焉其正中峯特險而

長其頂冢之陰亂石駢羅若可坐憩處有兩書生趨之
視其緣陟危然乎哉而猶未至也其路由東洞出者稍
近寬原有二游僧出焉軒軒有得色北下而西一徑更
深有道士跨驢背之而南一樵翁沾沾望驢後以行其
東洲橋堰之交則又有三牧兒伴二牛息焉夫工之所
就亦勞矣余既徘徊觀之已乃興感于中夫山林藪澤
之深懿爲天所覆皆有之然人常徒愛之以言而身不
肯安之此文雅之士每借耕漁清曠爲說而要知其所

顧不在焉者皆是矣况下此者乎哉今道士僧俱背而去之而書生則方抵巇未止豈非道士僧樸直不知矯飾其情迹而書生善詐乃區區漸出峻絕之上以成其好高之妄歟道士僧皆背去山林而僧徒步道士乘豈僧貧于道士而然歟世言僧之徒工以罪福脅誘人得皆常厚而道士之說不及此故不爲流俗所卹今見于此乃不然其亦有偶然者歟今又豈瘞家病世故之非平而作此以譏之歟言之座客皆大笑君益曰是皆不

足議不若平之以酒于是取酒而散焉座客前循州司
戶吳充道新青州察推陳才甫陳留蔡彥臣南陽鄧信
臣才甫之弟純隴西李孝孺并余合八人是時熙寧癸
丑之仲秋

送傅濟道赴漳浦序

傅濟道爲漳浦尉初之官過其友呂某焉某念別方遠
不當無言以贈也摻其袪而告之辭曰嘗論士之所以
賢在全乎其美不全其美非所以賢也全美之事有二

曰能文曰飲酒蓋博學而力行者士之正功而無得於
文酒則齷齪不奇短缺而卑譬如爲車高箱暢軸輻軫
穀輻莫不材集四驪六轡襄而總之其於厚載致遠何
陸之不可行然一不置轄則雖有善御無以運動一不
載脂則雖運不流故文之於士猶轄而酒猶脂使遂無
之何害其爲致用之名顧聚而莫運運而莫流終亦不
奇而已大丈夫智識出沒六合而下筆如鳥跂羈才幹
振攝萬務而對盃盞愁眉則齷齪而卑夫酒之於人豈

但足以銷憂蓋所以平和其心而壯直其氣心平則德厚氣直則行正是寧小補而世俗之人因屈原一語獨醒便謂實爾此何嘗知原之意吳時韋昭以好學顯惟不能飲酒故朝宴則竊以水漿代之終用此失吳主意以至滅身夫齷齪固可憐而況滅身乎士不顧賢則已如或願之必致思於此矣且文酒人在襁褓時豈其能之蓋亦長而得於習耳視今濟道之全美唯酒宜進之耳頃吾初識濟道時云我值糟亦神昏吾嘗爲之歎恨

以爲雖有文辭異於學究而不識醉鄉終亦不全而已
及前年同舍於汴陽則濟道已能竭三盞既別一年重
見則又進至六七矣蓋造物者之於人業賦以賢則詎
容不備唯其所習有至不至則各止其止矣夫世豈有
不可能之事哉濟道行矣吾聞漳浦瘴癘之邑唯酒爲
能禦其毒於濟道之習尤利也異時歸來名兼飲戶則
吾當大喜賀拜矣濟道勉之俗人護短必稱禹惡旨酒
而好善言又曰市道衆人率能劇飲何足領畧此言亦

誤發何則禹之所以聖者豈在於惡酒而已使其無德與功則其異於市道衆人何也彼今稱禹之人未必能好善言又無功德而特倣其惡酒其謬何翅千里此言願濟道勿聽熙寧五年三月甲午序

測幽記序

灌園先生曰無物不有然後爲天地無事不有然後爲世道通乎此而盡之則所謂非常之故不慮之變皆適然耳孰復諄諄然問觸觸然驚哉夫有無之相因其順

矣雖或戾逆猶未始違乎理是故天地之所以生陰陽之所以行日月之所以明鬼神之所以靈山川之所以凝人物之所以成皆在乎不得不然之故而未足以言其妙彼或謂之難知者未之思而已矣蓋理之所出數之所必前既有是後則未睹者特未睹耳今而有是昔或無傳者特偶無耳精也氣也非委何因命也性也非復何真形也品也非廣何伸廣之又廣未離乎息復之又復未離乎極委之以無所委而不失其則此非理之

大致毀數因乎此者也明以是入幽以是立出無不藏
入無不陽以化合機或戢或張其亦何常何異之有悲
夫世之人特以耳目廢其心而已矣古之得道者之于
物也智有所原有所不原言有所宣有所不宣書有所
載有所不載其所以不爲者非真不可也以爲姑不必
爾三才五行歛協推摩未有一日相無之道則事物之
變故舉足而值掀睫而際何必過而問爲哉而有問焉
是則寡見淺聞足以窒其靈府而開其愚徑也余少之

時讀書不出六經聽覽不離閭井以爲天下之理具諸此矣窘窘乎追逐衆儒之步武而稱誦不語怪神之說以拒乎諛詭之術如是者固久天誘吾使有超脫之幸是以泛觀春秋以來諸子百家之文章太史公至于國朝之史錄乃至山經地志野載私紀無所棄擲故識其所爲非常者多矣助之以凍餒漂浮屢游乎數千里之他邦而親見審問合于前識又多矣于是深思極索遂見理數之始終知古人之于此言不言各有意也時又

浩歎乎夏蟲井蛙不幸而不知冰海也讀阮瞻之事見其弊于慚懼而重悲之熙寧乙卯年始記于書所記隨所憶故不復品列率二十四事爲一篇第而積之沒吾齒而後止命之曰測幽言讀而能思者幽可測也自古記異之筆不少余雖不敢有記然無害于理數之所存而遂記焉趣異于蟲蛙而已矣若夫守經束教余雖不爾其憂無人乎哉

欽定四庫全書

灌園集卷八

宋 呂南公 撰

序

甘圃詩序

民不可一日無食食不可一日無蔬然則天下之圃為
人之業何可勝計惟其業之者未必儒則君子之為圃
所以異乎衆哉甘圃詩者先生巨公相與稱歎傳君翼
之志養之詩也傳氏世儒家邑里之所畏忌翼之少以

舉子取清俊名雖未即達而不敢怠曰吾力此庶幾有
祿以奉吾親既而久矣意猶不遂乃慨焉而嗟悶焉而
思擇其力之所能堪足以紓曉端之急者以謂唯圃為
可乃黽俛勤之正其畦相其宜謹其時播之殖之培之
利之稍與思勰之書合于是內之庖饗外之貿易皆得
其給而滋不急焉荷耜操耰且行且吟日于其間有過
而問焉者曰子儒者也為爾卑陋能哉今世書生何必
俱以禮義取資詭激其聲容以游乎梁紉屠販之中致

利甚潤捨是不為而使埃壒繞須眉吾盖苦之翼之笑
不暇對他日此聲屢至乃對曰士各有願圃雖卑吾所
願也得吾願斯足矣以吾之願易彼彼固愁吾能泰定
也歟哉有以是告于李先生泰伯者變色而發其詳乃
歎曰賢者之志也為詩以稱之繼其聲者凡若干人泰
伯死甘圃詩缺無作熙寧六年翼之以累舉得出於是
翰林學士曾公子宣與其弟館閣校勘子開皆勞之且
及泰伯之歎時又各贈一章翼之拜受南歸明年謂余

曰宜為我序我珍藏之以為吾家德慶余不獲辭嗟乎
士誠欲賢何遠之有昔者子路孔門高弟而以養葬為
傷微孔子之言則菽水幾不自安傳曰知其無可奈何
而安之若命唯有德者能之當翼之為圃時所謂無可
奈何者也唯其能安故至于甘甘者好之上而樂之下
也非有德者詎能名此藏之世世篋衍麗句高辭軸而
籤之與史爭以得於畦町耬耰而已夫賢何遠之有若
余文之鄙何足以重翼之乎

楊公留題道卿上人棲真塔亭詩序

道卿上人生于福州年十二隨其舅至建昌即捨家事
太平元新和尚年十七落髮為比丘氣韻蕭蕭若有願
而未修和尚發之曰汝欲得道離法已乎汝惡乎求之
曰然請無求于書而持于心乃東行入松谿精舍視物
如人視人如身不飾此以映彼不八中而十外波靡馳
騁之務一不涉于其胸居三十有二年松谿之主死其
徒謀所以嗣事者曰非道卿上人其誰堪于是逼之上

人避不肯聽其徒強之上人俯而思曰怨物之來拒事之交豈足以為道于是聽焉其為主領如其莫為而衆賴以安久而如初至于八十筋骨不勞神爽益清則歎寄而念無焉其徒請之上人曰而何怪我且孰有夢而不覺者哉乃相地于堂之西偏先為之屋而俟竈焉曰以此順化他日其徒相語以吾上人之經措若是可以勿命之乎德琳禪師之墓實占堂東故今議名于上人之兆所以別于禪師皆曰稱以棲真可哉自是稱之上

人曰棲乎哉且孰知其不又興真乎哉且孰知其終免
于偽乎哉雖然免之不免又之不又舉非我懷我亦順
陰陽而已矣如指聽臂而已矣是時光祿卿清江楊公
聞而遺之以詩而一時才士多從而遺之松谿之人詫
曰公賢貴人而賜文于此上人寧草草者是宜勒之金
石以示無窮衆皆曰可即以上人之命來曰辭有以助
楊公而致吾不沒者是在夫子惟遂有畀也某辭而不
獲乃序而畀之是時熙寧七年四月初吉

相山新圖序

道散德不明然後學分九流辨方揆日相罔觀象卜食之言立故墓宅之師專門其書之多與儒同而祖習之人或悟或迷亦與學於儒者同此歷古以來圖牒論撰之所以相望而出也古圖山形八其後演而廣之為三百六十今又廣之為千二百且每圖俱為之說者吳山人智伯之所撰也書既成分三篇篇分上下卷凡六命曰相山新圖始求余序以冠其端余聞之也道出而為

理理出而為數數出而為形色故有形有色皆可按而
察知其祥咎始終之變天地山川同得于數者也是以
無所逃于推步疇人之文雖然文不患不具而患乎意
之不能通意不患不通而患乎識之不能忘苟至於忘
矣則自一照千因母知子何書之足多何學之足名苟
異乎此亦迷焉而已矣新圖之廣多矣而智伯以為崖
略耳蓋形之所變名有所不勝盡而言之所至意有所
不勝盡夫惟學者之才識有明暗之參差則魚兔筌蹄

其敢守越而待秦哉嗚呼迷以書悟以書余豈獨為新圖而太息也智伯建昌之南城人李泰伯嘗稱其能明所學者也求余序時熙寧九年之仲冬

十八路地勢圖序

罷侯置守以為天下積千四五百年易十有餘姓中間華夏且混且裂為三為二為十六為九其變故多矣郡縣之城治大概略相循沿而其乘便隨時析併遷因廢復僑創不勝名號之紛錯也學者操禹貢春秋譜讀之

紙編屢敗然于後世之所變有不及悉也職方之史郎
計之吏據圖按牒各熟其一時然于前世之本初有不
能詳也蓋知古而不知今其為儒也腐知今而不知古
其為儒也淺君子之于天下也何淺何腐與其腐也寧
淺逃淺必資于腐逃腐必資于淺是為兩得之術余求
世儒所出禹貢圖觀之家各不同則知其不能裁以後
世之所變然也願一作是書欲見職方圖經而不可得
熙寧末年得所謂十八路圖略者考之叅以天禧九域

書則四封際接往往差舛蓋畫手之屢失也以書正圖而約以繪焉用防乎腐若夫有淺之患則吾不患久矣夫欲聚米者按之思過半矣

陳殿院集序

余為童兒時見文章有建安陳師道所製而患未甚曉少長則知愛之而恨不得其全書未幾已聞士論惜其早世于御史矣後師道之終二十年子師韓為南城丞余始從之求書得三十餘通皆雜萃存藁者為之次比

刪正舛錯除舉場應擬外著四百五十六篇勒成十五
卷以還曰嗚呼君子哉其質美而秀其志大而正其氣
直而充故思慮之所繞辭語之所達無非聖賢經治根
本而遠離羣小畛逕未嘗彷彿涉似也夫惟內之所得
與外之所益流通傳會不溺不蔽者其知之矣彼區區
于雕繪以疾其心者何足以知之師道之為布衣有所
存發間見于文至後入官悉能履蹈不忘平生之言借
其壽愈高位愈大則其建立可勝天下之福哉師道深

于春秋蓋與泰山孫復齊能而師道仕望轉高故不倚
經以名春秋索隱論五卷御史奏疏二卷皆別傳不列
此集目師道之葬其友福唐陳述古既序銘之余故不
書其行業而獨推見其志氣之所到于此夫學而不足
以知師道則亦安能讀是十五卷而許余于序哉元豐
六年冬至日袞斧前憲書

贈武陵翁詩序

武陵楚仙鄉龔姓望焉翁耆艾之總名也余論斯人野

逸平和而喜事欲其別于流俗之序字故緣望以稱之
昔余幼時聞翁以治折傷有名云嘉祐中縣尉羅彥輔
迎轉運使于撫界橋折馬驚墮彥輔肱髀骨破肉裂塌
然不能運動翁為治之旬日而愈其效類爾園南城境
乃至隣數百里折傷者必責愈於翁無不得其欲者翁
家道傍無田桑封殖獨種庭竹千竿資醫養十口泰定
不乏行旅過門踵相交翁遇之皆有理致無不得其歡
心者其接儒生最謹鄉之人莫及也余聞如此及余羈

游去故園則過之與語信焉視其屋壁既有題詩贈之者矣自是出歸每過之而壁詩歲加多且滿熙寧八年余與友兄黃顯翁還自郡翁酌酒其前楹以醉相邀逡巡自道老夫無事於文墨而才子誤遺以好辭吾不知其益乎否也吾里人未嘗賞此皆以為不若蔬根稻粳之宜拾也吾不擬同之孰能為我說以解謝之乎黃兄舉醖以屬余余蓋許之而未暇于今七年矣黃兄不幸墓木已拱把而翁朱顏白髮康強如舊其求余說也滋

勤嗚呼豈其誠知文之工拙不繫窮達矣乎夫古之所
謂鄉之善士亦何流品之限題之以內外之分焉耳以
今考之倉廩愈實而禮節愈廢衣食愈足而榮辱愈昧
豈不識字者然哉若翁之所成不拒不要不厭所處之
境而希雲霄有所不至而不失其至未始為高而有在
於高謂之善事謂之喜事之豪其可矣乎必有知余言
者矣

王夢錫集序

維天生材維世長之長失其道則雖有俊茂偉明之質
有不能自保其成者矣吾於周道既亡而見之夫所知
所行壹迪先王之學而不誘于俗習者豪傑特起之士
也而欲仕之心則天下之所同向非自信之篤自知之
明則亦安能置已于悠悠寂寞之鄉而處外鑠之光榮
如塵滓之去來哉秦漢以還所為抗論說於周孔下風
以克有傳於世者皆非有待于長養輔助而致之者也
得之于心文之于言考之于前聞盡吾智力之能至而

已君師朋友於吾乎何有是故晁董公孫賈誼劉向之徒雖或不純乎聖人而後世諸儒腐爛區區終莫能望其程躅也誠使此諸人出于周孔之世其所成固可知又使之出于魏晉隋唐五季之間則又不論可知矣夫謂之木矣何莫任乎曲直根深本固而後幹偉枝強彼匠石之有無誰之職歟知乎此者萬萬也信乎此者萬或千之一也是古之人所以可貴而不多多也嗟乎其不多多盖有不幸存乎其間矣吾友王嚮字夢錫生數

歲而喜書少長則治進士業茁然衆駭其進而莫敢議其所止也既冠猶未得志于舉場夢錫益自刻勵覺其所治未足以居先王之學則欲盡其智力以圖之顧家日貧親日老轉轉不救則曰及吾無營養之患而後吾智力足以致也庶幾不負古人會熙寧天子將以經術作新士類而丞相長安公父子實始受命成之夢錫家遠方獨取所謂雜說字說者讀而思之推見其指乃解詩孟子合四十萬言書既成而雋新說亦出夢錫又取

而讀之頓脚大笑曰果與吾書槩合于是人皆以夢錫為必能由此得祿以養其親而後卒其素所欲致者也而再試益不得志則又竭焉去之太學其行也諗余焉余曰聞道而知之行之我也貧富窮達彼也太學之異于吾山則余所不知夢錫徑去不顧至未幾主講者果悅而稱之浸浸乎聞矣俄而病死初曾子固為洪州余往候之從容訪余以後來俊秀余以夢錫為言其後子固歸省松楸而夢錫獻文子固語人曰建昌學士世不

乏吾以望若人悲夫乃遽不幸夢錫歸葬之明年其兄
定拾餘藁數百紙以父命授余曰願得次比而表題之
余為之剟去擬試之作而存著其可者詩書序辨論總
百七篇釐為五卷所謂四十萬言者悉不著也蓋夢錫
之智力所欲為與所能為非五卷之謂而不幸不得致
盡以成焉其尤可悲也已夫繇後世之法以進則夢錫
雖及仕吾安能知其窮達徒使其懷如許美才困于有
餘之四十萬言而無得也存不足之五卷余獨能使夢

錫見知于世乎哉知之者知之蓋將有焉叙以告其兄
使藏之而待元豐七年中秋日

送鄧德夫序

子弟之樂有賢父兄蓋為愚無能者言之彼賢而有才
則自立烏乎待其誘掖而養成顏冉孟揚不聞其父兄
最賢而襟蘊所就卓卓如此顧雖不露勲業然使之遭
時發達則其凌厲超軼誰能抑之惟夫不靈之人德性
無以自張故其涉世動須依賴莫教則不之學莫導則

不之行譬如南婦習乘無助之梯韉挽韉則未知所據
既能據而漸進莫善為之先後則無以騁而迅焉嗟乎
以此議世之子弟賢有才者真見恩耳吾鄉鄧德夫二
十而能文三十而登第有兄甚賢而從仕尤早與德夫
居聚者蓋無幾而德夫為布衣學行著於鄉既仕政理
聞於上此豈亦養成誘掖於父兄歟忽忽之徒或未嘗
為德夫思此也德夫解令金谿用薦格當改京秩而先
時詔舉學官公卿以德夫名聞既索文章在可中勢瀕

顯矣而當是之時德夫之兄初為翰林舍人於朝光價
籍甚人之不思想者或以為德夫雖賢乃因其兄以顯余
聞而歎焉曰嗚呼他人之兄貴且賢則已千萬其幸若
德夫者誠不幸爾以德夫之所就使兄而未貴則其發
達亦孰抑其超軼耶即德夫而不若人雖有貴兄欲蔭
其炎炎何足道耶嗚呼德夫誠見恩爾德夫將如京師
余戲為道此德夫笑曰人之於我也使果知我尚非吾
意彼如莫之知也吾庸意之吾知修己而已矣於是某

下拜曰是所以為德夫哉時又為之叙云

送沈忠夫序

呂某曰甚矣政之有以敗俗而俗之有以敗才古之時稱齊魯文學天性而就今觀之則野陋椎獃類如醉者之睡驚此王介甫既嘗論之姑置勿述然吾於齊魯之外之士亦有歎焉蓋先王之治以義行道而以禮行義此非天降地湧也明之心推之天下而已矣然則學而稱稟先王豈應知禮義之猶難歟夫刑法律令皆按約

禮義而為之章程者於學士之通知益為易事而自上之人以辭賦課天下應令諸生遂視法書如幼童之見大楯長刀雖欲親之更患莫能嗟乎孰致爾哉人之才固各有所窮然而未有不周於所用也周於為辭賦而不周於知法律豈果人才之窮正亦荒涼於俗習耳他謂之何周秦以來二千有餘歲以抵今法益不容一日捨捨之且無以為天下而入官之士不此曉識禍之在世寧有熄期雖高明敏達之士事無不通然大過人之

人常少中下之人常多不宜以所少望所多則出政之君臣詎當不以是為憂日者朝廷之制選人三歲六試不在可者冷其資任以辱之夫斧座之意豈亦專以不明禮律待一世之士人蓋以荒涼於俗習之才云爾而或者伏讀詔書必驚心而破膽謂得失之難慮嗟夫為士若此豈特不當吾君憂政之勤是又自甘於所敗者也雖冷以終身亦何足卹且夫吾之心固有以深明禮義則推吾才以致用於當時法之情文豈必難知借如

實未之學猶可按章程以求進其所至今奈何先守難
知以待莫習乎甘於俗敗者非也沈兄忠夫司戶於吾
軍余得與之游其為人沉靜端方庶幾所謂明於禮義
者其當代去而試法於有司也吾知其必不為冷任所
辱於其行序吾所歎以送之

送王中舍序

王大夫飲酒百醖不亂及為南城絕不肯飲曰務繁而
屢取醉此治之所以不辦也其為政以察民隱為主曰

不周知風俗情偽此治之所以不善也其追科必謹曰
民喜儒緩而上官期會不容違違且抵罪謹之乃所以
使其勿抵也其鞠獄念從輕曰教令無素而條章已嚴
不將之以仁恕則無往而不傷其生也其嫉惡必嚴曰
惡人在下則亂民在上則禍民也其佑善不厭曰知其
可人而乍援乍置此身之所以不誠也大夫之代去也
邑之士送以文或謂呂某曰汝亦知大夫者乎曰大夫
也余何故而不知之為衆誦之曰是則余之所知者也

送張戶曹序

進士足以懷常才亦足以顯異才此言何謂也得非所
治與所用戾歟經術也文辭也不兼優詩賦策論也不
兼工況於知古今識理體者乎雖然今日解褐衣明日
親吏事則雖有兼優且工之名皆無所用而不足倚為
其未始治今日之用故也是故笑者之腹常為儒生而
痛惟其明敏之人理與心會事與情悟觸而辯之撫而
盡之不俟沉吟而萬縷盡析雖平昔與人同而一旦與

人異異以才識不在他也有見於是者今余得於張兄
景倩景倩少時蓋常應舉京師屢試禮部優於趨時之
文而已何曾與衆異習及其登第而從政則日勝時旬
勝日月勝旬年勝月作祿而府史不敢期攝邑而衆眈
憂其去夫豈素熟此哉資明敏而非素其學故能致用
而顯其異才也余方論其才而并望則景倩者能之

送張君明序

儒之味莫善於強力莫惡於忍詬智者於不獲已則資

忍以濟其強其善在乎有所就不能強力而唯詬之忍
雖各有願然無以取善於世矣余食於羈旅四年而後
識清河張君明其入所謂儒之強力者也其讀書如劉
伶之向酒尊倒愈數而愈悅其為文如鄂公之運槩麾
詞所壓無有堅銳其言曰儒也其真而博大者猶不足
到況斐偽而細者乎吾欲得官則視時之所尚而酢之
收之以暇豫可矣不憂人能而我不能也居無幾何會
有司以口耳之伎進退天下士而盡棄心曉之學當此

之時余方斂臂願罷而君明倡踊曰誦彼之說以點綴鋪舒而已此童子之事我何畏之且吾聞口耳之伎以街哄為工今其以是見邀我將趨其叢聚以快吾手與聲計當直出其上吾趨決矣余於是而益推君明之強而自甘以不及也嗟余不佞於嵇康之疎嬾未嘗學之而自與之齊同異時開卷占對六經諸子命世之文猶然攬取其宗旨而遺其辭句今乃邀以一時之冗瑣其安能有就乎余不及君明遠矣或人聞而詬曰果哉其

以情蓄窮者余曰然詬也乎吾受詬多矣故時漫出文章累累為不知者所詬今又用情取詬焉唯不及君明焉往而逃詬吾之於世味終惡而已矣雖然亦味也敢書以送君

送何主簿序

忠厚之德三五之君所以先乎民而稱盛者也當是之時人體而行不薄不欺彼我皆然不用是相高譬如豐年繼稔雖增京庾不自知富及世下滴則上之人挾詭

偽以莅衆唯恐不濟況其才不足以居上者哉自然者
汨於使然雖有天真不喪者已如凶歲之一米矣有之
者甚寡無之者甚衆有無之相形衆寡之相傾故博大
真人著書而大笑回首至德之風繼之以太息自是執
史筆者始計一米而詳焉大率百許年間見記者不過
十數米而已其凶亦極矣夫使漢魏之君臣不作則丙
吉第五倫顧雍之徒亦滯穗耳有何必記記何必詳唯
其不得不記且詳此見者聞者所以欣欣稱幸余求忠

厚於世久矣而適見之昭武何慶孫余亦幸哉史之有
國野也唯大達者寄之國不然皆野載之慶孫方以進
士起家名譽甚隆其達之小大未可知故余雖幸猶遜
以俟之使慶孫之位終不配其德則吾書能詳之力不
愛也

送劉進士序


今日進士詭薄賤卑最為可耻不俟有道者而後知之
嘗聞道者固能知之矣夫惟不自誠故詭不自厚故薄

不自貴故賤不自高故卑雖云頽習因時然自失已甚
古之君子何嘗以不仕為義顧不至於亡耻以苟求焉
耳論者乃以為公卿顯人多以是始基故暫經胯下不
害其馴致功名是又不然舉世胯下而功名幾何人中
病而刺之凡亦苟於利達而已餓之人乞食則標以不
獲已此豈足以言義命然一伸手向人而不見酢又至
於再三皆漠然也悵吁而去之旁觀者曰是近於知耻
夫乞食至辱矣就中猶有知耻之人今餓不餓例乞數

數不見酢而不去殆欲以盜竊活其身果有耻乎無也
余從熙寧以來深於凍餒之憂亦隱忍於白襴以隨羣
輩步武蓋四往而三黜當其不在黜中也既自知為不
足榮矣至於今者斂臂願罷而自比悵吁之徒矣衆方
與我以無能之名而我則以為受之可無嫌何者今之
所謂無能者無亡耻苟求之能耳加余何嫌余之趣慕
如此而劉君適以贈言取於余豈非誤哉謝之覲其悔
也而不肯止故為之一說盖乞食非難能之事也其情

易知而可憐若盜則無可言者而其情非聖人不能知之今聽雞而入唯恐不先見星而出唯恐不後羣然商剽掠之可否邀記誦之分均上之人非必以真賢實才相處而人各妄意其爵祿此皆今進士之心迹而曾異於跖徒之所為否乎劉君且力為之此其實矣而不獲已乃其名也實易為而名難免余安知劉君果有遇於酢與無有哉姑亦願其能知可耻云爾古之人以其身為重於天下而今也為一切之溫飽而跛跛於白襪之

間豈不可憐劉君行矣萬一遭有道者過而問焉則對
以腹空腹鳴足矣



欽定四庫全書

集部

灌園集卷十九

詳校官庶吉士臣陳若霖

侍讀臣孫球覆勘

謄錄監生臣黃維

謄錄監生臣范重榮

欽定四庫全書

灌園集卷九

宋 呂南公 撰

記

麻姑山僊都觀初建東嶽府君殿記

熙寧三年某繇建業歸明年夏五月訪僊都視觀東隅
有屋正新問其有且新之自道士曰觀故有岱宗府君
像而几筵無次遂掃鐘樓下以居前道正黃君太和為
吾言吾山百靈正位而此神尚坐鐘樓下非禮容咸秩

之意我慮之以為恨則謀專起殿以遷之覆其橐中貲聚工取材既竭猶不給又持其說以率鄉邑之豪使各出力助是維屋之所以有新余聽而善之又明年正月太和以書來陳岱宗府君之有殿也經始前年之夏而畢役去年之秋凡材章覆填之直費蓋五百千而丹青綵漆不與計殿之制以楹數之得十有六環殿而室者其楹又百六十有奇應為我記之以辭某曰然是固宜言嶽神者祀典之所謂尊視三公而衆神之莫得班者

也位在名山迺不以正謬將誰任善矣太和之能慮也蓋天下之事所為乖序也常因乎小或加大而宜尊者反卑知其故者或力不得以正或雖力而不強是故理亂得以相形使夫任事而必此之知知而務正以力力又克強常如太和之於此殿則叔世何必有而太平何須頌聲哉吾於是而感焉太和有道術冲厚君子也賢於其流衆莫不敬之故能訖恨濟謀起今有於昔無遂正宜尊之位余雖愛文誼猶不可書來之三曰丁酉記云

大仁院重建佛殿記

殿為屋名不見於古經以爾雅細碎猶不著而南華說
劍乃著之蓋六國諸侯初變題號以異者為高至於秦
窮而其稱遂著其究主以易乎內外朝之名劉漢始承
惟視事之位則以題之乃世皆爛熟則宴私之地亦以
題焉禮文之變其必弊如此象教立於中上帝公助其
莊嚴故梵王以殿居而學老之徒攀玉京稱秩其奉與
梵王同孔子死二千歲乃蒙王爵而有廟於天下廟有

殿此三人者生無百里之勢以臨衆民而死以能聖之德享齊大君周公復作必不發論凡為殿壓以鵠吻環以鈎盾其庭容其陞崇其位正以深其事重矣勢非君主德非孔老釋迦而輒居焉智雖不及周公論之可也夫天下之人知殿之名尊而不思所以居其尊是故輕於奉擁而不當公義自今而察苟有靈真之號於佛老下風而因其所奉之力足則皆居以殿而不疑此與夫宴私名殿何異至於房祠邑祀民壹以其正座為之殿

嗚呼作始有倫而令乎婦女古之人豈虛言哉是維世
習之極弊而鄒魯搢紳以陽弗聞為宏者也而今則論
焉豈勇於反之哉謹禮之變難俗之非緣事以寄乎情
故論焉而不以罄凡今三聖人所享唯梵王為莫盛何者
孔子之廟郡國或以為學則謂之盛然其中皆一殿而
已佛老之居謂之盛者其殿則二三之而精密壯麗又
不可貲其如是孰能肩若夫鍾梵所建星分鱗布於井
落山林其勢雖不在於盛而各不失於足蓋徒有院佛

有殿斯足矣事有然理有原此又余之論而不以罄者也江西之縣四十六而南城居縣之一南城之佛寺二百一十五而大仁居寺之一其地去縣七十里而遙其於井落山林蓋又居星鱗之一而長老言其起於唐太和中然則焚修舊矣光化三年行常禪師於此遷寂其真身塔在今院西偏鄉民禱雨之地懷赴如響故其為佛事也滋足熙寧元年院僧有暹請於衆言吾舍畢治惟佛殿宜新而未新於是里豪余致收者率力戶資之

或敦匠或獻材諸役具至是歲十月戊申新殿成諸像亦蛻塵力戶來落之相與慶謹凡計其貲雜五百千而羨論其資之優者指過有成黃守安徐守忠衆謂有暹必記於石以告而勤暹雅於余遂來懇乞蓋非文無以行於遠也使世道而每不變則此院之得名若暹之謀余過黃徐氏之力何必無繼且以余之不佞而文之不荀也何直歲月云乎論雖不以罄世必有知余者矣有暹姓陳氏其為人靜以莊其舉非輕於奉擁其乞宜於

莫之拒殿成後七年冬十一月記

華藏寺佛殿記

代郭主簿作

由道而為言淡乎其無味則中士以下有不足以循之
體道而立教則故常玩易之俗有時而不振輔教以制
法則依違苟且之弊遂變而形見至於因天下之理迹
而耀之以禍福之利害然後多欲之生民莫不悚動而
從之帝公之貴富臣庶之賤卑惟聽其所煽惑而已萬
一愆負容貸而佚樂容致則冥冥之報顯顯之責非所

過而問焉也其悚動之心一至則割棄髮膚炮灼頂臂
無所敢愛而況於身外之才力乎此釋氏之莊嚴所以
益新而每大也崇仁為邑領治八鄉而郭中塔廟華嚴
居其甲其佛殿之雄麗費財五十萬乃能成而發其氏
具出之彼唯悚動之心一至焉耳某年月日始事某年
月日落成凡其所以為之雄麗者莫不竭盡其方術嗚
呼亦已勤矣夫為婦人女子不得出於盛古之際而同
流俗於教法爛漫之後求所以善吾身於存沒初終既

無所取循矣方又穀以憚憚之發而其貲利蓄藏傾於一殿而無所靳也其心豈不可矜矣哉余為之書蓋所以矜之元豐元年六月日記

北池記

北榮盡間對而周之其制如庭其雷下注鍾而為之池春動以來泓浸襄階憐其無物涵游訪於屢買四五魚鱸養之其中異時奴獻田之螺又選十數養焉日向久魚產童子十餘口蕭蕭相從浮頭漪上或驚之暫沒去

少頃復出噉啜以為恆比其長矣雖屢攪之猶不現余於是感乎人之幼壯也既七八月天不雨而雷絕漪痕稍落羣鼠輒夜下漉之麗泥而魚善奔潛鼠不能有所執唯螺鈍滯又無逃鄉鼠食其肉無子遺當是時鰌遁最深雖工於漉者猶不克覘其尾余悲螺之為物有殼自周而以不敏於運故見戕於鼠又憐魚雖奔潛而終不如鰌遁之深也憂其水大涸則并免鼠禍呼僮掬而徙之他池因書感為北池記

韓韓齋記

錢塘盛襲明從其兄殿中丞簽判於建昌日與三弟講學於官舍一日署其齋為韓韓臨川吳文仲者仰而讀之悚焉誦司馬牛之言曰人皆有兄弟我獨亡誦已其容有感襲明使來語曰非子無以說吾署齋之意余故為之說蓋名之不可以不應其實久矣草木之生皆有孤之英葩而詩詠萼跼獨引棠棣者彼固有以昌其美於實也以天倫之璀璨夫豈苟以衆多為貴顧必俱

昌於德然後乃為可貴間嘗思之問學所以進德也襲
明年二十汲汲然甚於趨利者其弟襲美力與之相亞
探拭研礪不到不置不盡不饜何但外而已蓋已邵其
中何但達而已蓋將大其功譬如縱宛駒逸夷路其勢
發發人驚其進而莫知其所止也是維盛氏之所以昌
而韡韡之所以美若夫世官餘祿朱藍合還尤非所以
恃者自文肅之興諸孫以不試仕者七八十身而襲明
未嘗道也按此亦足以嘗其所慕矣視今天下庭闈之

所庇其兄先弟後者家不為少然不短於才則闕於行
不自禍其身則召累宗門此其與詩人所歌終鮮何異
若犬羊雞鶩其同氣非不總總亦其無以離於物雖多
何預比數且襲明之意豈能為不預比數者謀之請以
吾言謝吳君襲明曰然謹用以為記

得軒記

余已記韓韓齋襲明又以來言吾之於道也求之內而
已內者固道之所集於我集斯備矣而猶將之以求蓋

不勉而中不思而得者聖人之事聖非吾所宜居則得與求因其安可廢雖然至於忘然後得非所知也而況於求乎哉五常百行所以足乎己者也而性存焉非外取庸何求軒裳黻冕豐功大業所以利乎人者也而命存焉非內必庸何求然則吾之所以無待者其可知也古之人不以一室之明而忽天下之光也使吾徑出於忘猶不果以求諱吾齋之陰截壁而檻焉同吾三季於其間論義游文以俟其求故題之曰得軒得者為未得

者懸擬之也使其各得而之忘夫然後可慶吾韡韡未
慶子姑為我書南公遂書之如前

老懶軒記

年中半於七十衰非暮疾非痼世不以為老求心循理
畏衆人之所畏世不以為懶而我則以之自許焉唯其
處順而委蛇故也聞古之至人與世浮游於物不迂謂
我馬則馬謂我牛則牛環乎其莫之擇也故能免患而
自得若夫睢盱矯揭甘譽而苦毀則亦焉往而不獲其

所寄哉昔余飢寒力不足以活身則倣諸生為進士以
幸於未殍及既為之則識字過多序言過奇思義過微
超遙不戒遂違羣衆而登列莊韓柳之域蓋已嘗懷蛇
足之疑矣方是時也論者固以為善於古文章而不善
於今辭賦非所以適一時之用余聞之不已嘗疑而致
悔也又加數年更事歷變憂傷熟爛齒壯而氣鬱矣慮
煩而善忘矣天下乃始以記誦補拆相高倚文信安昌
之牆效顰受唾以相軋也余雖欲從之而智力踈矣於

是彷徨斂臂斲為無用而已夢想田廬以規圖飽煖耽
玩文史以致其癖嗜而人亦次第不以飛騰相期也蕭
蕭乎潛移而嘿運猶懼有未許我者也揣摩人情願以
老懶自蓋有過而問焉則崖畧以示之果轉語以譁莫
之信也或私於吾僮曰而公視昏而嚼廢乎曰未也尚
日書細字啖牛皮以食酒然則乖慵放肆寔無所省乎
曰否工駟販出九年披翻紙冊吟寫伊鳴未之止也然
則奈何老懶之云乎益轉語以譁余聞之而頷曰會當

有明之者矣俄有人焉為衆釋之曰彼其今之不善於
記誦補拆也猶昔之不善於辭賦也有不善之實而名
隨之雖欲不居其安可得夫百果諸蔬毛血之類均以
養人然過久不取則堅頑禿殼而不美實始見棄且廟
堂宵旰羅網羣才亦主於養人云爾不適於一人之用
則委而不取猶果蔬毛血之以老棄也謂之老宜矣雖
然其有以也或出於莫之為也可以為而莫之為謂之
懶宜矣余聞之而大快如世之獲官榮利澤者也曰善

乎許我於無用矣蘸筆以題偃仰之軒謂之老懶所以
順而自蓋也嗟乎德不及至人而時之委棄甚於馬牛
余之優幸大矣異夫時之不召而自往未信而求試者
聽雞裹飯待曉棘籬之外變色而爭進腋索臂搜以即
脾俎之後輟食忘飲流汗被踵顧晷影以促促然驚憂
愁五內以覲覲也老懶者其知免矣夫必不以余為軋
已且譁而論之矣記於軒壁以述優幸

虛齋記

萬億及秭之廩積不自知其容而儲飢石者見之色動
千門萬戶之宮室不自知其庇而老革主者聞之心醉
君子行賢而去自賢之行故無遠邇無小大雖甚褊庸
猶知敬愛而推服天下所少者才也才有以應萬事之
變而所知有不至焉則天下所少不獨才又常在乎智
也智足以知才足以行而德未至乎忘則雖才智既異
於衆人其究猶慚於逆旅是故古人之論誠賢必以俊
而能厚為無以尚之蓋長民者俊有餘而不足於厚矜

張脫畧之俗繇此而漸成其敝豈一躬之薄而已臨邛
李侯之為南城撫事旬日而清俊明敏之聲流於四境
幽村僻落夫婦之愚連合之悅心游語恍然若令在側
莫敢欺莫敢違彌年之爭直於須臾一介之善坐享安
集其為政治底此則才智之具可知矣人蓋知敬愛李
侯而不知李侯之自忘其美也居無幾何獄訟蕭疎朱
墨閒暇便坐之北始葺室以宴休而題其榜曰虛齋有
請其意者李侯曰吾惟虛涼而領劇邑懼所未至故俛

仰於此以致吾思若莊之生白咸之受人皆非吾敢也於是邑之人聳視偃聽莫不推服李侯之厚真盛德之若不足者也夫自先王之澤亡儒者以彩飾相師其所論治已與治人熟其言焉耳亦何嘗有人見哉李侯文史縱橫倫輩莫敢望其屈於一邑為南城之幸會天其或者畀此邑之見見聞聞使一由於勿薄已乎讀書以俟之異之時士若民克知矜張脫畧之為可耻夫然見李侯之於此邑心化之矣元豐四年五月一日記

妙靈觀興造記

宋興五十年天下富康上方虛懷瑞應展儀睢秦而黃
老教術在所嚴崇祠館之建彩飾相望有復有增如昭
出冥如株斯榮彰明秀衍海內傾注徒患無志不患無
地徒患非地不患無財官聽民悅懣踊集就細大具作
有見則立於是時也勞坊為觀籍在而屋亡齋壇剝裂
榛莽焉耳道士凌宗旦實經營之觀泉陟岡圖位像設
盖卜築三徙而後得今所據其昌漸矣備而未大也肇

自祥符甲寅至於嘉祐己亥而宗旦下世又二十年元豐之戊午而其嗣孫黃世南始新而大之為寢室為法堂明年為三清北極二殿又為東廂又明年為西廂又明年為三門外門又明年為鐘樓而屋之壯麗無一不備可謂大矣屋以楹計為二百五十錢以萬計為九十其三役勤矣而唯三清殿費出於蕭績餘皆世南以相墓宅取貲於人而致之初宗旦之師魏元吉者江南樞密岑之諸妹岑死元吉棄官奉道能詞章居南豐之真

元觀章聖時被召入玉清昭應宮焚修久之以母老求
歸而時相許之蓋嘗有志於勞坊而力不足及歸老矣
宗旦為成之宗旦者虔州興國人有游藝善為人其得
世南而教之盡其方曰是孫可倚以大吾教者也果如
其責云嗚呼有時如祥符有志如魏凌乃積歲如許而
未及於成比及世南則閱五歲而始成焉夫亦數之存
乎安得智者而與之言哉勞坊昔額也治平中改賜妙
靈觀舊無田以食故第於祥符以前及改賜額而郡守

吳絳將以寄房法廢之世南訟於轉運使得復存及新屋也賢有餘則又買荒田為之地而居養之計足矣始過余述其勤曰願記於石有告於後也使之知繼余以謂繼非口舌之能致也俟其人可矣詩書所陳興王之祖宗憂勞懇刻一言動不敢適已凡以有繼為榮爾而果每榮乎其枯固已屢矣何況一觀然則今日之記妙靈當如後世何無記可也若夫枯久而落落而亡不勝其殘毀絕沒然後有知榮之為美而作於中興則今日

之記妙靈庶幾有想聞而感激者歟記之亦可也繼乎繼乎名籍之云乎繼必若世南則吾為之言無愧矣五年壬戌秋九月記

茅將軍廟記

將軍之名不書於史氏而威靈福澤有以動人豈其知將軍者不悟於可神之始而直悚於已神之後歟初熙寧庚戌年余過江寧借圖經讀之見溧陽縣東有茅將軍廟云將軍俗或呼司徒其解引稽神錄所載浙西僧

德林說常至舒州遇男夫獨薙草於荒郊者德林問欲何為男夫言家在桐城前自縣趨州至此疾足不能進倒卧草間日暮四顧不及人煙唯聞豺虎嗥踞於時分謂必死俄有部從如大將過焉顧見吾卧為下馬停徊又指麾留二卒曰善護此民清旦送之其家無恙語訖上馬忽不見男夫病稍輕便强起問二卒汝主何人二卒曰是茅將軍者也將軍常夜出獵虎哀汝或傷故使守汝問未既而東方日上二卒亦忽不見自是能步徑

歸吾縣今疾無恙矣吾德將軍故從所見之地為廟以報之德林住舒十年比還浙西處處作茅將軍廟稽神錄出於南唐之末然則民知將軍之為神正起於此耳建昌有廟在郡西城之外衢之曲舊無石記不知建立何時而民之欽畏歸賴皆曰茅司徒我朝之福帥廟屋老矣而未治近廟居者太丘陳愈為神謀之神亦見夢於愈愈告衆曰將軍庇吾人者蓋其所以為神自其聰明正直愛人而已今廟向壞無以新而報之其過在誰

乎吾儒者固將仕而以愛人為務事宜與神不異我不
悅夫庇吾人者之無奉也為率邑之巨家共出貲而大
新其廟起殿起廡起門及解牲之厨客神之位粉飾塗
覆畢善廟成於熙寧五年孟冬某甲子凡廟之屋以間
而計之蓋十有九明年愈為余誦興造之勤余憶江寧
所讀而示焉愈曰為我書并吾新廟之時歲我能勒之
石以謝衆於是從之六年秋九月癸亥記

黃籙祈雨記

天下之方術有見者能為唯謹者能傳克誠者能用自
道而觀世則消息盈虛若非力之所容致自世而觀道
則凡相靡相張相資相亡相終相始必有以寓乎常而
適其變者此博達之家所以坐覽羣學而捐情於棄絕
也先王之盛時其奉天地順陰陽於何弗至而於祈禳
禱請有官有文委曲備具是惟為國之訓後世教治政
令有不明有不行積久而遺初游波而昧源為士者且
不知領畧豈論於蠢蠢之民哉方術之多滿世其何怪

且彼為之其有以矣愛人利物以本其志尊天敬神以
行其言智不必能通天地而人皆準倣而揄揚之矣夫
以閉南縱北縈絲搏土而救歲旱攷之經嘗著乎而用
每得志則其傳之莫禦也固宜比及下流徙市禁屠歌
呼奔走以至焚暴無所不至而固令不沮豈亦為其有
以歟為譬則耕傳譬則時用譬則力道譬則穀穀無不
可養人者耕之方不必同而事同有耕有不耕而時同
耕且時矣而心不專志不致則亦鹵莽焉而已矣今世

之論或鄙方術如棄絕之晚即或用之而不能誠是皆
未足以言至理蓋古之所謂克誠豈草草之云固有以
尊其德性矣不然匹夫媼孺叩顙而囁嚅亦可以蒙君
子之感格矣熙寧天子在宥十載以海內登稔故易紀
號為元豐而郡縣溥率山川之神所主異數風土之沴
參差或見猶之十尺華壇非不溫密而一毛不得理不
無之三年時南城夏不雨彌三月縣令為之盡室不茹
葷夙宵出拜土龍舞巫如市而夜漢愈明徹當是時人

以為雨果不可禱四年五年皆然六年時臨邛李侯為令政事畢舉是夏閏六月復旱閏兩旬為七月朔旦李侯率其佐禱於仙都至則問道士亦有方術乎對曰教有黃籙道場是可以致而無信奉者故未嘗用李侯懇然趨為之香煙始升晴昊忽微曠有頃四山雲合雷作雨大至國野以達四境皆言霑足於是人知李侯之誠有以克而方術之足用雨非不可禱也李侯為余言識戒執作戒偽未克乎戒不足以言學苟為克之焉往而

不善皆知道無所不在而方術之擇皆知方術之可存而黃籙之忽其未之思乎為我記之以告能用者以慰能傳者亦將有博達者雍容而評裁乎其知之乎余辭不獲遂以記

普安院佛殿記

廢興有時乎吾不敢知而理存焉行為在人乎吾不敢知而義見焉知其可而進之能盡其力與心以不墮於悖夫然故事得而道順順斯行行斯立矣憂憂之誠自

我茫茫之數自彼未之至而不忘於圖前惟其分之循耳及其至也若非所以馴而致之者有矣謂豐年不可必而怠於耕非聞義者也謂不匱出於勤而預多其廩庾非信理者也未嘗怠未嘗預多而作緒其宜獨安知所謂天同而神相者果虛言哉余少之時從閭里輩行往來鯉潭間入龍安院問高寨之名於父老能言者蓋鮮或曰犁鋤之壠畝時時得繡鏃蝕兵則知其嘗為戰地矣其勢隱坳顯亢如卧虎如伏龜四陲所壓皆以俯

瞰如登樓而察市信夫其為必爭之利也喬木蒼煙蘿
蔓蔽虧鐘磬不鳴或不知僧居之在其上於是時老屋
數十楹僧三四人童子八九人晨夕曠適衣食僅給而
事佛未嘗有殿人不堪其嗟而僧末如之何也又數年
余得唐書吳錄讀之按知僖昭之代所在盜據而黎汾
危全諷之徒相持於此鄉高寨之名蓋起諸此時不見
其為院之因其亦兵荒之後無可考歟治平時詔易寺
名而龍安實為普安熙寧之季院之尊宿相繼遷寂今

仔扶師獨主梵唄年少刻苦以戒律為己任民之佛事
待師而足於是院有昌新之勢矣元豐六年七月己巳
院南居人姜君惟積初為之建殿凡土木丹青石甃所
集費錢四十萬其規制之雄工巧之妙皆絕常手殿之
成香像亦從而具矣是歲十月辛酉又為之起僧堂起
外門其財用不在四十萬中普安為院壯麗垂全矣一
溪之陽大路之衝平沙廣野榛莽不隔巨剎凌空簷翼
玲瓏金輝碧彩燦衍於林端木杪不俟標榜而行子知

其為如來之勝宅矣江君純厚人也余嘗從之問力田
生財其語條達而不紊有見於體勤穀分者也其配黃
氏能同其志於為佛事謹喜讚歎如恐不得為之其於
普安尤懋焉夫武成之主不作而儒者言動足以導民
長善者幾希若今之俗棄擲仕學而襲蹈園廬其欲遠
離凶德舍事佛其奚所歸乎江君是已傳曰何有何亡
黽勉求之深則方舟淺則泳游固其所也人有一錢之
屨數節之杖曳而卓之必擇地而置焉孰與多事之際

物輕於錢不啻鴻毛之比大阜而夫婦傾心捐四五十萬於佛僧不之彼而之此亦偶然歟其有在矣普安乎昔之血刃披猖孰知後日之香火焚修之道場乎昔之寔滅亡無孰知今日之輪奐渠渠謂之天歟則吾不敢知謂姜君之為善仔扶師之持教各能盡其心力以相遭於此時使普安為院勅焉興且盛是豈特人謀之至殆亦理之會歟理即數數即天天即義義即理吾不敢知者以立乎人吾終及之者以進乎天以勉夫憂憂而或

疑於茫茫者故書殿成之明年歲乙丑十二月甲申灌園呂某記

真如禪院十方住持新記

聚人徒駕師說其為奉養勸相固有法度立乎其間舉之存乎人謹之繫乎官孔王之庠校佛老之寺觀所以第廢興盛未有不繇此者蓋善衆以道明道以教振教以法法者事之成始成終小之不持大之安放維佛事滿天下而戒律之席為多禪定名門居其百二而已禪

定之師缺則官謀之戒律之席則如不聞吾求其說矣
非以戒律精若不俟飭勉而禪定汎衆宜有所齊乎是
為政者未之思爾夫精苦行之至難也人人能之則無
所用乎師資矣然則相與易而勿治是縱蠢蠢者假衣
飾以醉飽膏腴匿形鐘梵以遂其私焉耳始制失之矣
方來則不圖所以裁而革之其為不思孰若無政之愈
民之鼓舞於佛視其所至刻食減衣自一而百至於千
萬億足以供四海之僧而況於占莫限之美田誦書拜

像自憊不慧至於僅有形氣莫不仰東漸之聲而況於
值見性之達人維澤有水浚則為淵導則為川吹則為
瀾而水未云自表也有天下者奉佛惟恐不足而百官
有司不謹於為其徒擇師長攷名實過亦甚矣余行人
間覽觀大山長谷奇勝之地必在佛老所家其以禪命
院有舊而師一非其人官適不之察則鐘梵餘閒坐為
盜寇屠博之林豈論夫草草勿問之聚乎哉真如院故
曰地藏西距南城縣六十里在應寶山之陰長嶺之陞

天成三年閩僧惠通於此結庵能以精苦動人故歸嚮者日加居老矣得文敢者繼之盖自通初舍至於乾德甲子積三十七年而敢始建堂殿佛事以盛有田七百畝畝二獲鍾一而贏其山林場圃池籩之利又從而具其為奉養裕矣惟戒律無德嗣故裕乃所以資其為憊夫中下易流而勸相莫尸則亦何惡之不長何心之或迴爛漫無稽果至於屋破田荒舉債以度晨夕其敝可謂極矣元豐六年臨邛李公在令位聽採所及為之太

息曰是亦吾民也呼其主者詰而誚之凡院之所有嘗
見侵者使之還嘗致罔者使之止無稽之游黨使之絕
又告於上命以十方住持擇其師得今長老守訥而付
之禪席曰其爾克舉師唯唯後三年遣其門人介乘來
請文以記其事初師寄廬阜與大知識惠顥游相好元
豐五年建昌太守命顥以太平興國而師與俱行故李
公之擇真如近得之餘未識師也其請文則顥為之先
夫虛心正意明不二以待羣迷倡宗風而全獨有師其

有以葆之是之謂舉使是院之興終亦第而不廢繫乎
能得其人則必有令如李公察擇清平在法有嚴在教
有明夫然故十方之名實無負是之謂謹若今執筆志
叙則又余職也其何避之於是應其請而記焉是時元
豐八年八月戊辰灌園呂某記

龍母墓記

在南豐縣
八十里

熙寧間農夫游賦妻劉浴於溪遇黃犬迫之有娠產兩
鮎魚以大缸貯之須臾雷電晦冥魚失所在後三日劉

死葬於溪東磯阜之上數日雨溪大漲衆見兩魚循繞墓所疑以為龍也

欽定四庫全書

卷九